

宋書



卷一之五




139

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

T 2455/21





宋書目錄

梁沈約撰

皇明朝列大夫國子監祭酒臣方從哲

承德郎右春坊右中允管國子監書事臣黃汝良等奉

勅重校刊

帝紀十

志三十

列傳六十

凡一百卷

帝紀

宋書卷一

帝紀第一

武帝上

宋書卷二

帝紀第二

武帝中

宋書卷三

帝紀第三

武帝下

宋書第四

帝紀第四

少帝

宋書卷五

帝紀第五

文帝

宋書卷六

帝紀第六

孝武帝

宋書卷七

帝紀第七

前廢帝

宋書卷八

帝紀第八

明帝

宋書卷九

帝紀第九

後廢帝

宋書卷十

帝紀第十

順帝

志

宋書卷十一

志第一

志序

宋書卷十二

志第二

曆上

宋書卷十三

志第三

曆下

宋書卷十四

志第四

禮一

宋書卷十五

志第五

禮二

宋書卷十六

志第六

禮三

宋書卷十七

志第七

禮四

宋書卷十八

志第八

禮五

宋書卷十九

志第九

禮六

宋書卷二十

志第十

禮七

宋書卷二十一

志第十一

樂三

宋書卷二十二

志第十二

樂四

宋書卷二十三

志第十三

天文一

宋書卷二十四

志第十四

天文二

宋書卷二十五

志第十五

天文三

宋書卷二十六

志第十六

天文四

宋書卷二十七

志第十七

符瑞上

宋書卷二十八

志第十八

符瑞中

宋書卷二十九

志第十九

符瑞下

宋書卷三十

志第二十

五行一

宋書卷三十一

志第二十一

五行二

宋書卷三十二

志第二十二

五行三

宋書卷三十三

志第二十三

五行四

宋書卷三十四

志第二十四

五行五

宋書卷三十五

志第二十五

州郡一

揚州

南徐州

南兗州

兗州

宋書卷三十六

志第二十六

州郡二

南豫州

豫州

江州

青州

冀州

司州

宋書卷三十七

志第二十七

州郡三

荊州

郢州

湘州

雍州

梁州

秦州

宋書卷三十八

志第二十八

州郡四

益州

寧州

廣州

交州

越州

宋書卷三十九

志第二十九

百官上

宋書卷四十

志第三十

百官下

列傳

宋書卷四十一

列傳第一

后妃

孝穆趙皇后

孝懿蕭皇后

武敬臧皇后

武張夫人

少帝司馬皇后

文元袁皇后

潘淑妃

文路淑媛

孝武文穆王皇后

宣貴妃

前廢帝何皇后

文沈婕妤

明恭王皇后

後廢帝江皇后

順陳太妃

順謝皇后

宋書卷四十二

列傳第二

劉穆之

王弘

宋書卷四十三

列傳第三

徐羨之

傅亮

檀道濟

宋書卷四十四

列傳第四

謝晦

宋書卷四十五

列傳第五

王鎮惡

檀韶

向靖

劉懷慎

劉粹

宋書卷四十六

列傳第六

趙倫之

到彥之

開

王懿

張劭

宋書卷四十七

列傳第七

劉懷肅

孟懷王弟龍符

劉敬宣

檀祗

宋書卷四十八

列傳第八

朱齡石弟超石

毛脩之

傳引之

宋書卷四十九

列傳第九

孫處

蒯恩

劉鍾

虞丘進

宋書卷五十

列傳第十

胡藩

劉康祖

垣護之

張興世

宋書卷五十二

列傳第十一

宗室

長沙景王道憐

臨川烈武王道規 鮑照

營浦侯遵考 從子季連

宋書卷五十二

列傳第十二

庾悅

王誕

謝景仁 弟述

袁湛 弟豹

褚叔度

宋書卷五十三

列傳第十三

張茂度 子永

庾登之 弟炳之

謝方明

江夷

宋書卷五十四

列傳第十四

孔季恭

羊玄保

沈曇慶

宋書卷五十五

列傳第十五

臧燾

徐廣

傅隆

宋書卷五十六

列傳第十六

謝瞻

孔琳之

宋書卷五十七

列傳第十七

蔡廓

子興宗

宋書卷五十八

列傳第十八

王惠

謝弘微

王球

宋書卷五十九

列傳第十九

殷淳

子孚

弟冲

張暘

何偃

江智淵

宋書卷六十二

列傳第二十二

范泰

王准之

王韶之

荀伯子

宋書卷六十三

列傳第二十三

武三王

廬陵孝獻王義真

江夏文獻王義恭

衡陽文王義季

宋書卷六十二

列傳第二十二

羊欣

張敷

王徽

宋書卷六十三

列傳第二十三

王華

王曇首

殷景仁

沈演之

宋書卷六十四

列傳第二十四

鄭鮮之

裴松之

何承天

宋書卷六十五

列傳第二十五

吉翰

劉道產

杜驥

申恬

宋書卷六十六

列傳第二十六

王敬弘

何尚之

宋書卷六十七

列傳第二十七

謝靈運

宋書卷六十八

列傳第二十八

武二王

彭城王義康

南郡王義宣

宋書卷六十九

列傳第二十九

劉湛

范曄

宋書卷七十

列傳第三十

袁淑

宋書卷七十一

列傳第三十一

徐湛之

江湛

王僧綽

宋書卷七十二

列傳第三十二

文九王

南平穆王鐸

建平宣簡王宏

晉熙王昶

始安王休仁

晉平刺王休祐

鄱陽哀王休業

臨慶冲王休倩

新野懷王夷父

巴陵哀王休若

宋書卷七十三

列傳第三十三

顏延之

宋書卷七十四

列傳第三十四

臧質

魯爽

沈攸之

宋書卷七十五

列傳第三十五

王僧達

顏竣

宋書卷七十六

列傳第三十六

朱脩之

宗愨

王玄謨

宋書卷七十七

列傳第三十七

柳元景

顏師伯

沈慶之

宋書卷七十八

列傳第三十八

蕭思話

劉延孫

宋書卷七十九

列傳第三十九

文五王

竟陵王誕

廬江王禕

武昌王渾

海陵王休茂

桂陽王休範

宋書卷八十

列傳第四十

孝武十四王

豫章王子尚

晉安王子勛

松滋侯子房

臨海王子頊

始平孝敬王子鸞

永嘉王子仁

始安王子真

邵陵王子元

淮南王子孟

晉陵孝王子雲

南海哀王子師

淮陽思王子霄

東平王子嗣

武陵王贊

宋書卷八十一

列傳第四十一

劉秀之

顧琛

顧覲之

宋書卷八十二

列傳第四十二

周朗

沈懷文

宋書卷八十三

列傳第四十三

宗越

吳喜

黃回

宋書卷八十四

列傳第四十四

鄧琬

袁顛

孔顛

宋書卷八十五

列傳第四十五

謝莊

王景文

宋書卷八十六

列傳第四十六

殷孝祖

劉劭

宋書卷八十七

列傳第四十七

蕭惠開

殷琰

宋書卷八十八

列傳第四十八

薛安都

沈文秀

崔道固

宋書卷八十九

列傳第四十九

袁粲

宋書卷九十

列傳第五十

明四王

邵陵殤王友

隨陽王翽

新興王嵩

始建王禧

宋書卷九十一

列傳第五十一

孝義

龔穎

郭世道

吳達

孫法宗

張進之

余齊民

何子平

劉瑜

嚴世期

潘綜

蔣恭

許昭先

孫棘

宋書卷九十二

列傳第五十二

良吏

王鎮之

徐豁

阮長之

王歆之

宋書卷九十三

列傳第五十三

隱逸

戴顓

杜慧度

陸徽

江秉之

宗炳

周續之

王弘之

阮萬齡

孔淳之

劉凝之

龔祈

翟法賜

陶潛

宗彧之

沈道虔

郭希林

雷次宗

朱百年

王素

劉睦之

關康之

宋書卷九十四

列傳第五十四

恩倖

戴法興

戴明寶

徐爰

阮佃夫

于天寶

壽寂之

姜產之

李道兒

王道隆

楊運長

宋書卷九十五

列傳第五十五

索虜

宋書卷九十六

列傳第五十六

鮮卑

吐谷渾

宋書卷九十七

列傳第五十七

夷蠻

南夷

扶南國

西南夷

呵羅單國

婆皇國

婆達國

闍婆達國

師子國

天竺迦毗黎國

東夷高句驪國

百濟國

倭國

荆離州蠻

豫州蠻

宋書卷九十八

列傳第五十八

氏胡

胡大且渠蒙遜

張掖

宋書卷九十九

列傳第五十九

二凶

元凶劭

始興王濬

宋書卷一百

列傳第六十

自序

宋書目錄終

宋書卷一

本紀第一

梁沈約撰

哈佛大學漢和圖書館藏

皇明朝列大夫國子監祭酒臣方從哲

承德郎右春坊右中允管國子監司業臣黃汝良等奉

勅重校刊

武帝上

高祖武皇帝諱裕字德輿小名寄奴彭城縣綏里人漢高帝弟楚元王交之後也交生紅懿侯富富生宗正辟疆辟疆生陽城繆侯德德生陽城節侯安民安民生陽城釐侯慶忌慶忌生陽城肅侯岑岑生宗正平平生東

武城令某某生東萊太守景景生明經洽洽生博士弘
弘生瑯邪都尉悝悝生魏定襄太守某某生邪城令亮
亮生晉北平太守膺膺生相國掾熙熙生開封令旭孫
旭孫生混始過江居晉陵郡丹徒縣之京口里官至武
原令混生東安太守靖靖生郡功曹翹是爲皇考高祖
以晉哀帝興寧元年歲次癸亥三月壬寅夜生及長身
長七尺六寸風骨奇特家貧有大志不治廉隅事繼母
以孝謹稱初爲冠軍孫無終司馬安帝隆安三年十一
月妖賊孫恩作亂於會稽晉朝衛將軍闕謝琰前
將軍劉牢之東討牢之請高祖參府軍事十二月牢之

至吳而賊緣道屯結牢之命高祖與數十人覘賊遠近
會遇賊至衆數千人高祖便進與戰所將人多死而戰
意方厲手奮長刀所殺傷甚衆牢之子敬宣疑高祖淹
久恐爲賊所困乃輕騎尋之旣而衆騎竝至賊乃奔退
斬獲千餘人摧鋒而進平山陰恩遁還入海四年五月
恩復入會稽殺衛將軍謝琰十一月劉牢之復率衆東
征恩退走牢之屯上虞使高祖戍句章城句章城旣卑
小戰士不盈數百人高祖常被堅執銳爲士卒先每戰
輒摧鋒陷陣賊乃退還浹口于時東伐諸帥御軍無律
士卒暴掠甚爲百姓所苦唯高祖法令明整所至莫不

視賴焉五年春孫恩頻攻句章高祖屢摧破之恩復走入海三月恩北出海鹽高祖追而翼之築城于海鹽故治賊日來攻城城內兵力甚弱高祖乃選敢死之士數百人咸脫甲冑執短兵竝鼓噪而出賊震懼奪氣因其懼而奔之竝棄甲散走斬其大帥姚盛雖連戰尅勝然衆寡不敵高祖獨深慮之一夜偃旗匿衆若已遁者明晨開門使羸疾數人登城賊遙問劉諱所在曰夜已走矣賊信之乃率衆大上高祖乘其懈怠奮擊大破之恩知城不可下乃進向滬瀆高祖復棄城追之海鹽令鮑陋遣子嗣之以吳兵一千請爲前驅高祖曰賊兵甚精

吳人不習戰若前驅失利必敗我軍可在後爲聲援不從是夜高祖多設伏兵兼置旗鼓然一處不過數人明日賊率衆萬餘迎戰前驅旣交諸伏皆出舉旗鳴鼓賊謂四面有軍乃退嗣之追奔爲賊所沒高祖且戰且退賊盛所領死傷且盡高祖慮不免至向伏兵處乃止令左右脫取死人衣賊謂當走反停疑猶有伏高祖因呼更戰氣色甚猛賊衆以爲然乃引軍去高祖徐歸然後散兵稍集五月孫恩破滬瀆殺吳國內史袁山松死者四千人是月高祖復破賊於婁縣六月恩乘勝浮海奄至丹徒戰士十餘萬劉牢之猶屯山陰京邑震動高祖

倍道兼行與賊俱至于時衆力旣寡加以步遠疲勞而丹徒守軍莫有鬪志恩率衆數萬鼓噪登蒜山居民皆荷檐而立高祖率所領奔擊大破之投巘赴水死者甚衆恩以鼓排音敗自載僅得還船雖被摧破猶恃其衆力徑向京師樓船高大值風不得進旬日乃至白石尋知劉牢之已還朝廷有備遂走向鬱洲八月以高祖爲建武將軍下邳太守領水軍追恩至鬱洲復大破恩恩南走十一月高祖追恩於滬瀆及海鹽又破之三戰竝大獲俘馘以萬數恩自是饑饉疾疫死者大半自浹口奔臨海元興元年正月驃騎將軍司馬元顯西伐荊州刺

史桓玄玄亦率荆楚大衆下討元顯元顯遣鎮北將軍劉牢之拒之高祖參其軍事次溧洲玄至高祖請擊之不許將遣子敬宣詣玄請和高祖與牢之甥東海何無忌竝固請不從遂遣敬宣詣玄玄尅京邑殺元顯以牢之爲會稽內史懼而告高祖曰便奪我兵禍其至矣今當北就高雅於廣陵舉事卿能從我去乎答曰將軍以勁卒數萬望風降服彼新得志威震天下三軍人情都已去矣廣陵豈可得至邪諱當反復還京口耳牢之叛走自縊死何無忌謂高祖曰我將何之高祖曰鎮北去必不免卿可隨我還京口桓玄必能守節北面我當與

卿事之不然與卿圖之今方是玄矯情任筭之日必將用我輩也桓玄從兄脩以撫軍鎮丹徒以高祖爲中兵參軍軍郡如故孫恩自奔敗之後徒旅漸散懼生見獲乃於臨海投水死餘衆推恩妹夫盧循爲主桓玄欲且緝寧東土以循爲永嘉太守循雖受命而寇暴不已五月玄復遣高祖東征時循自臨海入東陽二年正月玄復遣高祖破循於東陽循奔永嘉復追破之斬其大帥張士道追討至于晉安循浮海南走六月加高祖彭城內史桓玄爲楚王將謀篡盜玄從兄衛將軍譙屏人問高祖曰楚王勲德隆重四海歸懷朝廷之情咸謂宜有

揖讓卿意以爲何如高祖旣志欲圖玄乃遜辭答曰楚王宣武之子勲德蓋世晉室微弱民望久移乘運禪代有何不可謙喜曰卿謂可爾便當是真可爾十二月桓玄篡帝位遷天子於尋陽桓脩入朝高祖從至京邑玄見高祖謂司徒王謐曰昨見劉裕風骨不肖蓋人傑也每遊集輒引接慇懃贈賜甚厚高祖愈惡之或說玄曰劉諱龍行虎步視瞻不凡恐不爲人下宜蚤爲其所玄曰我方欲平蕩中原非劉裕莫可付以大事關隴平定然後當別議之耳玄乃下詔曰劉諱以寡制衆屢摧妖鋒汎海窮追十殄其八諸將力戰多被重創自元帥以

下至于將士竝宜論賞以叙勳烈先是高祖東征盧循何無忌隨至山陰勸於會稽舉義高祖以爲玄未據極位且會稽遙遠事濟爲難俟其篡逆事著徐於京口圖之不憂不剋至是栢脩還京高祖託以金創疾動不堪步從乃與無忌同船共還建興復之計於是與弟道規沛郡劉毅平昌孟昶任城魏詠之高平檀憑之琅邪諸葛長民太原王元德隴西辛扈興東莞童厚之竝同義謀時栢脩弟弘爲征虜將軍青州刺史鎮廣陵道規爲弘中兵參軍昶爲州主簿乃令毅潛往就昶聚徒於江北謀起兵殺弘長民爲豫州刺史刁達左軍府參軍謀

據歷陽相應元德厚之謀於京邑聚衆攻玄竝剋期齊發三年二月己丑朔乙卯高祖託以遊獵與無忌等收集義徒凡同謀何無忌魏詠之詠之弟欣之順之檀憑之憑之從子韶弟祗隆與叔道濟道濟從兄範之高祖弟道憐劉毅毅從弟藩孟昶昶族弟懷玉河內向彌管義之陳留周安穆臨淮劉蔚從弟珪之東莞臧喜從弟寶符從子穆生童茂宗陳郡周道民漁陽田演譙國范清等二十七人願從者百餘人丙辰詰旦城開無忌服傳詔服稱詔居前義衆馳入齊聲大呼吏士驚散莫敢動卽斬脩以徇高祖哭甚慟厚加殯斂孟昶勸弘其日

出獵未明開門出獵人昶道規毅等率壯士五六十人
因開門直入弘方噉粥卽斬之因收衆濟江義軍初剋
京城脩司馬刁弘率文武佐吏來赴高祖登城謂之曰
郭江州已奉乘輿反正於尋陽我等竝被密詔誅除逆
黨同會今日賊玄之首已當梟於大航矣諸君非大晉
之臣乎今來欲何爲弘等信之收衆而退毅旣至高祖
命誅弘毅兄邁先在京師事未發數日高祖遣同謀周
安穆報之使爲內應邁外雖酬許內甚震懼安穆見其
惶駭慮事必泄乃馳歸時玄以邁爲竟陵太守邁不知
所爲便下船欲之郡是夜玄與邁書曰北府人情云何

卿近見劉諱何所道邁謂玄已知其謀晨起白之玄驚
懼封邁爲重安侯旣而廉邁不執安穆使得逃去乃殺
之誅元德扈興厚之等召桓謙卞範之等謀拒高祖謙
等曰亟遣兵擊之玄曰不然彼兵速銳計出萬死若行
遣水軍不足相抗如有蹉跌則彼氣成而吾事敗矣不
如屯大衆於覆舟山以待之彼空行二百里無所措手
銳氣已挫旣至忽見大軍必驚懼駭愕我案兵堅陣勿
與交鋒彼求戰不得自然走散此計之上也謙等固請
乃遣頓丘太守吳甫之右衛將軍皇甫敷北拒義軍玄
自聞軍起憂懼無復爲計或曰劉諱等衆力甚弱豈辦

之有成陛下何慮之甚玄曰劉諱足爲一世之雄劉毅家無檐石之儲樗蒲一擲百萬何無忌劉牢之甥酷似其舅共舉大事何謂無成衆推高祖爲盟主移檄京邑曰夫治亂相因理不常泰狡焉肆虐或值聖明自我太晉陽九屢構隆安以來難結皇室忠臣碎於虎口貞良弊於豺狼逆臣栢玄陵虐人鬼阻兵荆郢肆暴都邑天未亡難凶力繁興踰年之間遂傾皇祚主上播越流幸非所神器沉淪七廟毀墜夏后之懼浞豷有漢之遭莽卓方之於玄未足爲喻自玄篡逆于今歷年亢旱彌時民無生氣加以士庶疲於轉輸文武困於造築父子乖

離室家分散豈唯大東有杼軸之悲標梅有傾筐之墜而已哉仰觀天文俯察人事此而能久孰有可亡凡在有心誰不扼腕諱等所以叩心泣血不遑啓處者也是故夕寐宵興援獎忠烈潛構崎嶇險過履虎輔國將軍劉毅廣武將軍何無忌鎮北主簿孟昶兗州主簿魏詠之寧遠將軍劉道規龍驤將軍劉藩振威將軍檀憑之等忠烈斷金精貫白日荷戈奮袂志在畢命益州刺史毛璩萬里齊契掃定荆楚江州刺史郭昶之奉迎主上宮子尋陽鎮北參軍王元德等竝率部曲保據石頭揚武將軍諸葛長民收集義士已據歷陽征虜參軍庾曠

之等潛相連結以爲內應同力協規所在蜂起卽日斬
僞徐州刺史安城王脩青州刺史弘首義衆旣集文武
爭先咸謂不有一統則事無以輯諱辭不獲已遂摠軍
要庶上憑祖宗之靈下罄義夫之力剪馘逋逆蕩清京
輦公侯諸君或世樹忠貞或身荷爵寵而竝俛眉猶豎
自効莫由顧瞻周道寧不弔乎今日之舉良其會也諱
以虛薄才非古人勢接於已踐之機受任於旣頽之運
丹誠未宣感慨憤躍望霄漢以永懷眄山川以增厲授
檄之日神馳賊廷以孟昶爲長史摠攝後事檀憑之爲
司馬百姓願從者千餘人三月戊午朔遇吳甫之於江

乘甫之玄驍將也其兵甚銳高祖躬執長刀大呼以衝
之衆皆披靡卽斬甫之進至羅落橋皇甫敷率數千人
逆戰寧遠將軍檀憑之與高祖各御一隊憑之戰敗見
殺其衆退散高祖進戰彌厲前後奮擊應時摧破卽斬
敷首初高祖與何無忌等共建大謀有善相者相高祖
及無忌等竝當大貴其應甚近惟云憑之無相高祖與
無忌密相謂曰吾等旣爲同舟理無偏異吾徒咸皆富
貴則檀不應獨殊深不解相者之言至是而憑之戰死
高祖知其事必捷玄聞敷等竝沒愈懼使相謙屯東陵
口卜範之屯覆舟山西衆合二萬己未旦義軍食畢棄

其餘糧進至覆舟山東使丐士張旗幟於山上以爲疑
兵玄又遣武騎將軍庾禕之配以精卒利器助謙等高
祖躬先士卒以奔之將士皆殊死戰無不一當百呼聲
動天地時東北風急因命縱火煙燭張天鼓噪之音震
京邑謙等諸軍一時土崩玄始雖遣軍置陣而走意已
決別使領軍將軍殷仲文具舟於石頭仍將子姪浮江
南走庾申高祖鎮石頭城立留臺官焚桓溫神主於宣
陽門外造晉新主立于太廟遣諸將帥追玄尙書王假
率百官奉迎乘輿司徒王謐與衆議推高祖領揚州固
辭乃以謐爲錄尙書事領揚州刺史於是推高祖爲使

持節都督揚徐兗豫青冀幽并八州諸軍事領軍將軍
徐州刺史先是朝廷承晉氏亂政百司縱弛桓玄雖欲
釐整而衆莫從之高祖以身範物先以威禁內外百官
皆肅然奉職二三日間風俗頓改且桓玄雖以雄豪見
推而一朝便有極位晉民四方牧守及在朝大臣盡心
伏事臣主之分定矣高祖位微於朝衆無一旅奮臂草
萊之中倡大義以復皇祚由是王謐等諸人時衆民望
莫不愧而憚焉諸葛長民失期不得發刃達執送之未
至而玄敗玄經尋陽江州刺史郭昶之備乘輿法物資
之玄收略得二千餘人挾天子走江陵冠軍將軍劉毅

輔國將軍何無忌振武將軍劉道規率諸軍追討尚書左僕射王愉愉子荊州刺史綏等江左冠族綏少有重名以高祖起自布衣甚相凌忽綏桓氏甥亦有自疑之志高祖悉誅之四月奉武陵王遵爲大將軍承制大赦天下唯桓玄一祖後不在赦例初高祖家貧嘗負刀逵社錢三萬經時無以還逵執錄甚嚴王謐造逵見之密以錢代還由是得釋高祖名微位薄盛流皆不與相知唯謐交焉桓玄將篡謐手解安帝璽被爲玄佐命功臣及義旗建衆竝謂謐宜誅唯高祖保持之劉毅嘗因朝會問謐璽紱所在謐益懼及王愉父子誅謐從弟湛謂

謐曰王駒無罪而義旗誅之此是剪除勝已以絕民望兄旣桓氏黨附名位如此欲求免得乎駒愉小字也謐懼奔于曲阿高祖賤白大將軍深相保謐迎還復位光祿勳丁承之左衛將軍褚粲游擊將軍司馬秀役使官人爲御史中丞王禎之所糾察謝賡言辭怨憤承之造司宜藏高祖與大將軍賤白粲等備位大臣所懷必盡執憲不允自應據理陳訴而橫興怨忿歸咎有司宜加裁當以清風軌並免官桓玄兒子韶聚衆向歷陽高祖命輔國將軍諸葛長民擊走之無忌道規破玄大將鄭鈐等于桑落洲衆軍進據尋陽加高祖都督江州諸軍

事玄既還荆郢大聚兵衆召水軍造樓船器械率衆二萬挾天子發江陵浮江東下與冠軍將軍劉毅等相遇於崢嶸洲衆驚下擊大破之玄棄衆復挾天子還復江陵玄黨殷仲文奉晉二皇后還京師玄至江陵因西走南郡太守王騰之荊州別駕王康產奉天子入南郡府初征虜將軍益州刺史毛璉遣從孫祐之與參軍費恬送弟喪州下有衆二百璉弟子脩之時爲玄屯騎校尉誘玄以入蜀至枚回洲恬與祐之迎射之益州督護馮遷斬玄首傳京師又斬玄子昇於江陵市初玄敗於崢嶸洲義軍以爲大事已定追躡不速玄死幾一旬衆軍

猶不至玄從子振逃於華容之浦中招聚逆黨數千人晨襲江陵城居民競出赴之騰之康產皆被殺栢謙先匿於沮川亦聚衆以應振爲玄舉哀立喪廷謙率衆官奉璽綬于安帝無忌道規既至江陵與栢振戰于靈溪玄黨馮該又設伏于楊林義軍奔敗退還尋陽兗州刺史辛禺懷貳會北青州刺史劉該及禺求征該次淮陰又反禺長史羊穆之斬禺傳首京師十月高祖領青州刺史甲仗百人入殿劉毅諸軍復進至夏口毅攻魯城道規攻偃月壘皆拔之十二月諸軍進平巴陵義熙元年正月毅等至江津破栢謙栢振江陵平天子反正三

月天子至自江陵詔曰古稱大者天地其次君臣所以
列貫三辰神人代序諒理本於造昧而運周於萬葉故
盈否特襲四靈通其變王道或昧貞賢拯其危天命所
以永固人心所以攸穆雖夏周中傾賴靡甲之績恭倫
載竊寔二代是維或乘資藉號或業隆異世猶詩書以
之休詠記策用爲美談未有因心撫民而誠發理應援
神器於已淪若在今之盛者也朕以寡昧遭家不造越
自邁閔屬當屯極逆臣栢玄乘豐縱慝窮凶恣虐滔天
猾夏遂誣罔人神肆其篡亂祖宗之基旣湮七廟之饗
胥殄若墜淵谷未足斯譬皇度有晉天縱英哲使持節

都督楊徐兗豫青冀幽并江九州諸軍事鎮軍將軍徐
青二州刺史忠誠天亮神武命世用能貞明協契義夫
響臻故順聲一唱二溟卷波英風振路宸居清翳暨冠
軍將軍毅輔國將軍無忌振武將軍道規舟旗邁邁而
元凶傳首回戈疊揮則荆漢霧廓俾宣元之祚永固於
嵩岱傾基重造再集於朕躬宗廟歆七百之祐皇基融
載新之命念功惟德永言銘懷固已道冠開闢獨絕終
古書契以來未之前聞矣雖則功高靡尚理至難文而
崇庸命德哲王攸先者將以弘道制治深關盛衰故伊
望膺殊命之錫桓文饗備物之禮況宏徵不世顧邈百

代者宜極名器之隆以光大國之盛而鎮軍謙虛自衷誠旨屢顯朕重逆仲父乃所以愈彰德美也鎮軍可進位侍中車騎將軍都督中外諸軍事使持節徐青二州刺史如故顯祚大邦啓茲疆宇高祖固讓加錄尚書事又不受屢請歸藩天子不許遣百僚敦勸又親幸公第高祖惶懼詣闕陳請天子不能奪是月旋鎮丹徒天子重遣大使敦勸又不受乃改授都督荆司梁益寧雍涼七州并前十六州諸軍事本官如故於是受命解青州加領兗州刺史盧循浮海破廣州獲刺史吳隱之卽以循爲廣州刺史以其同黨徐道覆爲始興相二年三月

督交廣二州十月高祖上言曰昔天禍皇室巨狡縱篡臣等義惟舊隸豫蒙國恩仰契信順之符俯厲人臣之憤雖社稷之靈抑亦事由衆濟其翼獎忠勲之佐文武畢力之士敷執在已之謙用虧國體之大輒攝衆軍先上同謀起義始平京口廣陵二城臣及撫軍將軍毅等二百七十二人并後赴義出都緣道大戰所餘一千五百六十六人又輔國將軍長民故給事中王元德等十人各一千八百四十八人乞正封賞其西征衆軍須論集續上於是尚書奏封唱義謀主鎮軍將軍諱豫章郡公食邑萬戶賜絹三萬匹其餘封賞各有差鎮軍府佐

吏降故太傅謝安府一等十一月天子重申前令加高
祖侍中進號車騎將軍開府儀同三司固讓詔遣百僚
敦勸三年二月高祖還京師將詣廷尉天子先詔獄官
不得受詣闕陳讓乃見聽旋于丹徒閏月府將駱冰謀
作亂將被執單騎走追斬之誅冰父永嘉太守球球本
東陽郡史孫恩之亂起義於長山故見擢用初桓玄之
敗以桓冲忠貞署其孫胤至是冰謀以胤爲主與東陽
太守殷仲文潛相連結乃誅仲文及仲文二弟凡桓玄
餘黨至是皆誅夷天子遣兼大常葛籍授公策曰有扈
滔天夷羿乘釁亂節于紀實撓皇極賊臣桓玄怙寵肆

逆乃摧傾華霍倒拔嵩岱五嶽旣夷六地易所公命世
英縱藏器待時因心資敬誓雪國恥慨憤陵夷誠發宵
寐旣而歲月屢遷神器已遠忠孝幽寄寔貫三靈爾乃
介石勝機宣契畢舉訴蒼天以爲正揮義旅而一驅奔
鋒數百勢烈激電百萬不能抗限制路日直植城遂使
衝鯨潰流暴鱗奔漢廟勝遠加重氛載滌二儀廓清三
光反照事遂永代功高開闢理微稱謂義感朕心若夫
道爲身濟猶縻厥爵况乃誠德俱深勳冠天人者乎是
用建茲邦國永祚山河言念載懷匪云足報往欽哉俾
屏余一人長弼皇晉流風垂祚暉烈無窮其降承嘉策

對敷朕命十二月司徒錄尚書楊州刺史王謐薨四年
正月徵公入輔授侍中車騎將軍開府儀同三司楊州
刺史錄尚書徐兗二州刺史如故表解兗州先是遣冠
軍劉敬宣伐蜀賊譙縱無功而返九月以敬宣挫退遜
位不許乃降爲中軍將軍開府如故初僞燕主鮮卑慕
容德僭號於青州德死兄子超襲位前後屢爲邊患五
年二月大掠淮北執陽平太守劉千載濟南太守趙元
驅略千餘家三月公抗表北討以丹陽尹孟昶監中軍
留府事四月舟師發京都泝淮入泗五月至下邳留船
艦艦重步軍進琅邪所過皆築城留守鮮卑梁父莒城

二戍竝奔走慕容超聞王師將至其大將公孫五樓說
超宜斷據大峴刈除粟苗堅壁清野以待之彼僞軍無
資求戰不得旬月之間折棰以笞之耳超不從曰彼遠
來疲勞勢不能久但當引令過峴我以鐵騎踐之不憂
不破也豈有預芟苗稼先自蹙弱邪初公將行議者以
爲賊聞大軍遠出必不敢戰若不斷大峴當堅守廣固
刈粟清野以絕三軍之資非唯難以有功將不能自反
公曰我揣之熟矣鮮卑貪不及遠計進利剋獲退惜粟
苗謂我孤軍遠入不能持久不過進據臨朐退守廣固
我一得入峴則人無退心驅必死之衆向懷貳之虜何

憂不剋彼不能清野固守爲諸君保之公旣入峴舉手指天曰吾事濟矣六月慕容超遣五樓及廣寧王賀賴盧先據臨朐城旣聞大軍至留羸老守廣固乃悉出臨朐有巨蔑水去城四十里超告五樓曰急往據之晉軍得水則難擊也五樓馳進龍驤將軍孟龍符領騎居前奔往爭之五樓乃退衆軍步進有車四千兩分車爲兩翼方執徐行車悉張幔御者執稍又以輕騎爲遊軍軍令嚴肅行伍齊整未及臨朐數里賊鐵騎萬餘前後交至公命兗州刺史劉藩弟并州刺史道憐諮議參軍劉敬宣陶延壽參軍劉懷玉慎仲道索邈等齊力擊之日

向景公遣諮議參軍檀韶直趨臨朐韶率建威將軍向彌參軍胡藩馳往卽日陷城斬其牙旗悉虜超輜重超聞臨朐已拔引衆走公親鼓之賊乃大奔超遁還廣固獲超馬僞輦王璽豹尾等送于京師斬其大將段暉等十餘人其餘斬獲千計明日大軍進廣固卽屠大城超退保小城於是設長圍守之圍高三丈外穿三重塹停江淮轉輸館穀於齊土撫納降附華戎歡悅援才授爵因而任之七月詔加公北青冀二州刺史超大將垣遵遵弟苗竝率衆歸順公方治攻具城上人曰汝不得張綱何能爲也綱者超僞尚書郎其人有巧思會超遣綱

稱藩於姚興乞師請救興僞許之而實憚公不敢遣綱
從長安還泰山太守申宣執送之乃升綱於樓上以示
城內城內莫不失色於是使綱大治攻具超求救不獲
綱反見虜轉憂懼乃請稱藩求割大峴爲界獻馬千疋
不聽圍之轉急河北居民荷戈負糧至者日以千數錄
事參軍劉穆之有經略才具公以爲謀主動止必諮焉
時姚興遣使告公云慕容見與隣好又以窮告急今當
遣鐵騎十萬逕據洛陽晉軍若不退者便當遣鐵騎長
驅而進公呼興使荅曰語汝姚興我定燕之後息甲三
年當平關洛今能自送便可速來穆之聞有羌使馳入

而公發遣已去以興所言并荅具語穆之穆之尤公曰
常日事無大小必賜與謀之此宜善詳之云何卒爾便
荅公所荅興言未能威敵正足怒彼耳若燕未可拔羌
救奄至不審何以待之公笑曰此是兵機非卿所解故
不語耳夫兵貴神速彼若審能遣救必畏我知寧容先
遣信命此是其見我伐燕內已懷懼自張之辭耳九月
進公太尉中書監固讓僞徐州刺史段宏先奔索虜十
月河北歸順張綱治攻具成設諸奇巧飛樓木慢之屬
莫不畢備城上火石弓矢無所用之六年二月丁亥屠
廣固超踰城走征虜賊曹喬胥獲之殺其亡命以下納

口萬餘馬二千疋送超京師斬于建康市公之北伐也
徐道覆仍有闚關之志勸盧循乘虛而出循不從道覆
乃至番禺說循曰本住嶺外豈以理極於此正以劉公
難與爲敵故也今方領兵堅城之下未有旋日以此思
歸死士掩襲何劉之徒如反掌耳不乘此機而保一日
之安若平齊之後小息甲養衆不過一二年間必璽書
徵君若劉公自率衆至豫章遣銳師過嶺雖復將軍神
武恐必不能當也今日之機萬不可失旣剋都邑傾其
根本劉公雖還無能爲也循從之乃率衆過嶺是月寇
南康廬陵豫章諸郡守皆委任奔走于時平齊問未至

卽馳使徵公公之初剋齊也欲停鎮下邳清盪河洛旣
而被徵使至卽日班師鎮南將軍何無忌與徐道覆戰
于豫章敗績無忌被害內外震駭朝廷欲奉乘輿北走
就公尋知賊定未至人情小安公至下邳以船運輜重
自率精銳步歸至山陽聞無忌被害則慮京邑失守乃
卷甲兼行與數十人至淮上問行旅以朝廷消息人曰
賊尚未至劉公若還便無所憂也公大喜單船過江逕
至京口衆乃大安四月癸未公至京師解嚴息甲撫軍
將軍劉毅抗表南征公與毅書曰吾往習擊妖賊曉其
變態新獲奸利其鋒不可輕宜須裝嚴畢與弟同舉又

遣毅從弟藩往止之毅不從舟師二萬發自姑孰循之
初下也使道覆向尋陽自寇湘中諸郡荊州刺史道規
遣軍至長沙爲循所敗逕至巴陵將向江陵道覆聞毅
上馳使報循曰毅兵衆甚盛成敗事係之於此宜并力
摧之若此克捷天下無復事矣根本既定不憂上面不
平也循卽日發巴陵與道覆連旗而下別有八艘艦九
枚起四層高十二丈公以南藩覆沒表送章綬詔不聽
五月劉毅敗績于桑落洲棄船步走餘衆不得去者皆
爲賊所擒初循至尋陽聞公已還不信也旣破毅乃審
凱入之間竝相視失色循欲還還尋陽進平江陵據二
州以抗朝廷道覆謂宜乘勝徑進固爭之疑議多日乃
見從毅敗問至內外洶擾于時北師始還多創痍疾病
京師戰士不盈數千賊旣破江豫二鎮戰士十餘萬舟
車百里不絕奔敗還者竝聲其雄盛孟昶諸葛長民懼
寇漸逼欲攤天子過江公不聽昶固請不止公曰今重
鎮外傾彊寇內逼人情危駭莫有固志若一旦遷動便
自瓦解土崩江北亦豈可得至設令得至不過延日月
耳今兵士雖少自足以一戰若其克濟則臣主同休苟
厄運必至我當以死衛社稷橫尸廟門遂其由來以身
許國之志不能遠竄於草間求活也我計決矣卿勿復

言昶恐其不濟乃爲表曰臣諱北討衆竝不同唯臣贊
諱行計致使疆賊乘間社稷危逼臣之臯也今謹引分
以謝天下封表畢乃仰藥而死於是大開賞募投身赴
義者一同登京城之科發居民治石頭城建牙誠嚴時
議者謂宜分兵守諸津要公以爲賊衆我寡若分兵屯
則測人虛實且一處失利則沮三軍之心今聚衆石頭
隨宜應赴旣令賊無以測多少又於衆力不分若徒旅
轉集徐更論之耳移屯石頭乃柵淮斷查浦旣而羣賊
大至公策之曰賊若於新亭直進其鋒不可當宜且回
避勝負之事未可量也若回泊西岸此成擒耳道覆欲

自新亭白石焚舟而上循多疑少決每欲以萬全爲慮
謂道覆曰大軍未至孟昶便望風自裁大勢言之自當
計日濟亂今決勝負於一朝旣非必定之道且殺傷士
卒不如按兵待之公于時登石頭城以望循軍初見引
向新亭公顧左右失色旣而回泊蔡洲道覆猶欲上循
禁之自是衆軍轉集脩治越城築查浦藥園廷尉三臺
皆聚以實衆冠軍將軍劉敬宣屯北郊輔國將軍孟懷
王屯丹陽郡西建武將軍王仲德屯越城廣武將軍劉
默屯建陽門外使寧朔將軍索邈領鮮卑具裘虎班突
騎千餘匹皆被練五色自淮北至于新亭賊竝聚觀咸

畏憚之然猶冀京邑及三吳有應之者遣十餘艦來拔石頭柵公命神弩射之發輒摧陷循乃止不復攻柵設伏兵於南岸使羸老悉乘舟艦向白石公憂其從白石步上乃率劉毅諸葛長民北出拒之留參軍徐赤特戍南岸命堅守勿動公既去賊焚查浦步上赤特軍戰敗死沒有百餘人赤特棄餘衆單舸濟淮賊遂率數萬屯丹陽郡公率諸軍馳歸衆憂賊過咸謂公當徑還拒戰公先分軍還石頭衆莫之曉解甲息士洗浴飲食之乃出列陳於南塘以赤特違處分斬之命參軍諸葛叔度朱齡石率勁勇千餘人過淮羣賊數千皆長刀矛鉞精

甲曜日奮躍爭進齡石所領多鮮卑善步稍竝結陳以待之賊短兵弗能抗死傷者數百人乃退走會日暮衆亦歸劉毅之敗豫州主簿袁興國反叛據歷陽以應賊琅邪內史魏順之遣將謝寶討斬之興國司馬襲寶順之不救而退公怒斬之順之弟也於是功臣震攝莫敢不用命六月更授公太尉中書監加黃鉞受黃鉞餘固辭以司馬庾悅爲建威將軍江州刺史自東陽出豫章七月庚申羣賊自蔡洲南走還屯尋陽遣輔國將軍王仲德廣川太守劉鍾河間太守蒯恩追之公還東府大治水軍皆大艦重樓高者十餘丈盧循遣其大

將荀林寇江陵桓謙先於江陵奔羌又自羌入蜀僞主
譙縱以爲荊州刺史謙及譙道福率軍二萬出寇江陵
適與林會相去百餘里荊州刺史道規斬謙于枝江破
林於江津追至竹町斬之初循之走也公知其必寇江
陵登遣淮陵內史索邈領馬軍步道援荊州又遣建威
將軍孫季高率衆三千自海道襲番禺江州刺史庾悅
至五畝嶠賊遣千餘人據斷嶠道悅前驅鄱陽太守虞
丘進攻破之公治兵大辦十月率兖州刺史劉藩寧朔
將軍檀韶等舟師南伐以後將軍劉毅監大尉留守府
後事皆委焉是月徐道覆率衆三萬寇江陵荊州刺史

道規又大破之斬首萬餘級道覆走還盆口初公之遣
索邈也邈在道爲賊所斷道覆敗後方達自循東下江
陵斷絕京邑之間傳者皆云已沒及邈至方知循走循
初自蔡洲南走留其親黨范崇民五千人高艦百餘戍
南陵王仲德等聞大軍且至乃進攻之十一月大破崇
民軍焚其舟艦收其散卒循廣州守兵不以海道爲防
是月建威將軍孫季高乘海奄至而城池峻整兵猶數
千季高焚賊舟艦悉力而上四面攻之卽日屠其城循
父以輕舟奔始興季高撫其舊民戮其親黨勒兵謹守
初公之遣季高也衆咸以海道艱遠必至爲難且分微

見力二三非要公不從勅季高曰大軍十二月之交必破妖虜卿今時當至廣州傾其巢窟令賊奔走之日無所歸投季高受命而行如期剋捷循方治兵旅舟艦設諸攻備公欲御以長筭乃屯軍雷池賊揚聲不攻雷池當乘流逕下公知其欲戰且慮賊戰敗或於京江入海遣王仲德以水艦二百於吉陽下斷之十二月循道覆率衆數萬方艦而下前後相抗莫見舳艫之際公悉出輕利鬪艦躬提幡鼓命衆軍齊力擊之又上步騎於西岸右軍參軍庾樂生乘艦不進斬而徇之於是衆軍並踊騰爭先軍中多萬鈞神弩所至莫不摧陷公中流蹙

之因風水之勢賊艦悉泊西岸上軍先備火具乃投火焚之煙燭張天賊衆大敗追奔至夜乃歸循等還尋陽初分遣步軍莫不疑恠及燒賊艦衆乃悅服召王仲德請還爲前驅留輔國將軍孟懷玉守雷池循聞大軍上欲走向豫章乃悉力柵斷左里大軍至左里將戰公所執麾竿折折幡沉水衆竝恠懼公歡笑曰往年覆舟之戰幡竿亦折今者復然賊必破矣卽攻柵而進循兵雖殊死戰弗能禁諸軍乘勝奔之循單舸走所殺及投水死凡萬餘人納其降附宥其逼畧遣劉藩孟懷玉輕軍追之循收散卒尚有數千人逕還廣州道覆還保始興

公旋自左里天子遣侍中黃門勞師于行所

宋書卷一終

宋書卷二

本紀第二

梁沈約撰

皇明朝列大夫國子監祭酒臣方從哲

德郎若 坊石中允管國子監司業事臣黃汝良等奉

勅重校刊

武帝中

七年正月己未振旅于京師改授大將軍揚州牧給班
劍二十人本官悉如故固辭免南北征伐戰亡者並列
上賻贈尸喪未反遣主師迎接致還本土二月盧循至
番禺為孫季高所破收餘眾南走劉藩孟懷玉斬徐道

覆于始興晉自中興以來治綱大弛權門并兼彊弱相
凌百姓流離不得保其產業栢玄頗欲釐改竟不能行
公既作輔大示軌則豪彊肅然遠近知禁至是會稽餘
姚虞亮復藏匿亡命千餘人公誅亮免會稽內史司馬
休之天子又申前命公固辭於是改授太尉中書監乃
受命奉送黃鉞解冀州交州刺史杜慧度斬盧循傳首
京師先是諸州郡所遣秀才孝廉多非其人公表天子
申明舊制依舊策試征西將軍荊州刺史道規疾患求
歸八年四月改授豫州刺史以後將軍豫州刺史劉毅
代之毅與公俱舉大義興復晉室自謂京城廣陵功業

足以相抗雖權事推公而心不服也毅既有雄才大志
厚自矜許朝士素望者多歸之與尚書僕射謝混丹陽
尹邠僧施竝深相結及西鎮江陵豫州舊府多割以自
隨請僧施爲南蠻校尉既知毅不能居下終爲異端密
圖之毅至西稱疾篤表求從弟兗州刺史藩以爲副貳
僞許焉九月藩入朝公命收藩及謝混竝於獄賜死自
表討毅又假黃鉞率諸軍西征以前鎮軍將軍司馬休
之爲平西將軍荊州刺史兗州刺史道憐鎮丹徒豫州
刺史諸葛長民監太尉留府事加太尉司馬丹陽尹劉
穆之建威將軍配以實力壬午發自京師遣參軍王鎮

惡龍驤將軍蒯恩前襲江陵十月鎮惡剋江陵毅及黨
與皆伏誅十一月己卯公至江陵下書曰夫去弊拯民
必存簡恕捨網脩綱雖煩易理江荆彫殘刑政多闕頃
年事故綏撫未週遂令百姓疲匱歲月滋甚財傷役困
慮不幸生凋殘之餘而不減舊刻剝徵求不循政道宰
莅之司或非良幹未能菲躬儉苟求盈給積習生常漸
不知改近因戎役來涉二州踐境親民愈見其瘼思欲
振其所急卹其所苦凡租稅調役悉宐以見戶爲正州
郡縣屯田池塞諸非軍國所資利入守宰者今一切除
之州郡縣吏皆依尚書定制實戶置臺調癸卯梓材庚

子皮毛可悉停省別量所出巴陵均折度支依舊兵運
原五歲刑已下凡所質錄賊家餘口亦悉原放以荊州
十郡爲湘州公乃進督以西陽太守朱齡石爲益州刺
史率衆伐蜀進公太傅揚州牧加羽葆鼓吹班劔二十
人九年二月乙丑公至自江陵初諸葛長民貪淫驕橫
爲士民所患苦公以其同大義優容之劉毅旣誅長民
謂所親曰昔年醢彭越今年誅韓信禍其至矣將謀作
亂公克期至京邑而每淹留不進公卿以下頻日奉餼
於新亭長民亦驟出旣而公輕舟密至已還東府矣長
民到門引前郤人閑語凡平生於長民所不盡者皆與

及之長民甚說已密命左右壯士丁旡等自慢後出於坐拉焉長民墜牀又於地毆之死於牀側輿尸付廷尉并誅其弟黎民旡驍勇有氣力時人爲之語曰勿跋扈付丁旡先是山湖川澤皆爲豪彊所專小民薪採漁釣皆責稅直至是禁斷之時民居未一公表曰臣聞先王制治九土攸序分境畫疆各安其居在昔盛世人無遷業故井田之制三代以隆秦革斯政漢遂不改富彊兼并於是爲弊然九服弗擾所託成舊在漢西京大遷田景之族以實關中卽以三輔爲鄉閭不復係之於齊楚自永嘉播越爰託淮海朝有匡復之筭民復思本之心

經略之圖日不暇給是以寧民綏治猶有未遑及至太司馬桓溫以民無定本傷治爲深庚戌土斷以一其業于時財阜國豐實由於此自茲迄今彌歷年載畫一之制漸用贛弛雜居流寓閭伍弗脩王化所以未純民瘼所以猶在臣荷重任恥責實深自非改調解張無以濟治夫人情滯常難與慮始所謂父母之邦以爲桑梓者誠以生焉終焉敬愛所託耳今所居累世墳壟成行敬恭之誠豈不與事而至請準庚戌土斷之科庶子本所弘稍與事著然後率之以仁義鼓之以威武超大江而跨黃河撫九州而復舊土則戀本之志乃速由於當年

在始暫勤要終所以能易伏惟陛下垂矜萬民憐其所
失永懷鴻鴈之詩思隆中興之業旣委臣以國重期臣
以寧濟若所啓合允請付外施行於是依界土斷唯徐
兗青三州居晉陵者不在斷例諸流寓郡縣多被併省
以公領鎮西將軍豫州刺史公固讓太傅州牧及班劔
奉還黃鉞七月朱齡石平蜀斬僞蜀王譙縱傳首京師
九月封公次子義真爲桂陽縣公以賞平齊及定盧循
也天子重申前命授公太傅揚州牧加羽葆鼓吹班劔
二十人將吏百餘敦勸乃受羽葆鼓吹班劔餘固辭十
年息民簡役築東府起府舍平西將軍荊州刺史司馬

休之宗室之重又得江漢人心公疑其有異志而休之
兄子譙王文思在京師招集輕俠公執文思送還休之
令自爲其所休之表廢文思并與公書陳謝十一年正
月公收休之子文寶兄子文祖竝於獄賜死率衆軍西
討復加黃鉞領荊州刺史辛巳發京師以中軍將軍道
憐監留府事休之上表自陳曰臣聞運不常一治亂代
有陽九旣謝圯終則泰昔墓臣肆途皇綱絕紐十世未
改鼎祚再隆大尉臣諱威武明斷首建義旗除蕩元凶
皇居反正布衣匹夫匡復社稷南剿盧循北定廣固千
載以來功無與等由是四海歸美朝野推崇旣位窮台

收權傾人主不能以道處功恃寵驕益自以酬賞既極
便情在無上刑戮逾濫政用暴苛問鼎之迹日彰人臣
之禮頓缺陛下四時膳御觸事縣空宮省供奉十不一
在皇后寢疾之際湯藥不周手與家書多所求告皆是
朝士共所聞見莫不傷懷憤歎口不敢言前揚州刺史
元顯第五息法興桓玄之豐逃遠於外王路既開始得
歸本太傅之胤絕而復興凡在有懷誰不感慶諱吞滋
之心不避輕重以法興聰敏明慧必爲民望所歸芳蘭
旣茂內懷憎惡乃妄扇異言無罪卽戮大司馬臣德文
及王妃公主情計切逼竝狼狽請命逆肆禍毒誓不矜

許寃酷之痛感動行路自以地卑位重荷恩崇大乃以
庶孽與德文嫡婚致茲非偶寔由威逼故衛將軍劉毅
右將軍劉藩前將軍諸葛長民尚書僕射謝混南蠻校
尉郗僧施或盛勳德胤令望在身皆社稷輔弼協讚所
寄無罪無辜一旦夷滅猜忍之性終古所希臣自惟門
戶衰破賴之獲存皇家所重終古難匹是以公私歸焉
事盡祗順再授荊州輒苦陳告自以才弱位隆不宜久
荷分陝屢求解任必不見聽前經攜侍老母半家俱西
凡諸子姪悉留京輦臣兄子譙王文思雖年少常人粗
免咎悔性好交遊未知防遠羣醜交構爲其風聲諱遂

剪戮人士遠送文思臣順其此旨表送章節請廢文思
改襲太宗遣息文寶送女東歸自謂推誠奉順理不過
此豈意諱包藏禍心遂見討伐加惡文思構生罪疊羣
小之言遠近噂咭而臣純愚闇信必謂不然尋臣府司
馬張茂度狼狽東歸南平太守檀範之復以此月三日
委郡叛逆尋有審問東軍已上諱今此舉非有怨憎正
以臣王室之幹位居藩岳時賢旣盡唯臣獨存規以翦
滅成其篡殺鎮北將軍臣宗之青州刺史臣敬宣竝是
諱所深忌憚欲以次除蕩然後領移天日於事可易今
荆雍義徒不召而集子來之衆其會如林豈臣無德所

能綏致蓋七廟之靈理貫幽顯輒授文思振武將軍南
郡太守宗之子竟陵太守魯軌進號輔國將軍臣今與
宗之親御大衆出據江津案甲抗威隨宜應赴今絳旗
所指唯諱兄弟父子而已須剋蕩寇逆尋續馳聞由臣
輕弱致諱凌橫上慚俯愧無以厝顏休之府錄事參軍
韓延之故吏也有幹用才能公未至江陵密使與之書
曰文思事源遠近所知去秋遣康之送還司馬軍者推
至公之極也而了不遜愧又無表疏文思經正不反此
是天地之不容吾受命西討止其父子而已彼土僑舊
爲所驅逼一無所問往年郝僧施謝邵任集之等交構

積歲專爲劉毅謀主所以至此卿等諸人一時逼迫本無纖釁吾處懷期物自有由來今在近路正是諸人歸身之日若大軍登道交鋒接刃蘭艾吾誠不分故具示意并示同懷諸人延之報曰承親率戎馬遠履西畿闔境士庶莫不惶駭何者莫知師出之名故也今辱來疏始知以譙王前事良增歎息司馬平西體國忠貞款愛待物當於古人中求耳以君公有匡復之勳家國蒙賴推德委誠每事詢仰譙王往以微事見劾猶自表遜位況以大過而當嘿然邪但康之前言有所不盡故重使胡道諮白所懷道未及反已奏表廢之所不盡者命耳

推寄相與之懷正當如此有何不可便興兵戈自義旗秉權以來四方方伯誰敢不先相諮疇而逕表天子邪譙王爲宰相所責文表廢之經正何歸表使何因可謂欲加之罪其無辭乎劉諱足下海內之人誰不見足下此心而復欲欺誑國士天地所不容在彼不在此矣來示言處懷期物自有由來今伐人之君陷人以利真可謂處懷期物自有由來者矣劉藩死於閭闔之內諸葛斃於左右之手甘言詫方伯襲之以輕兵遂使席上靡款懷之士閭外無自信諸侯以是爲得筭良可恥也貴府將佐及朝廷賢德寄性命以過日心企太平义矣吾

誠鄙劣嘗聞道於君子以平西之至德寧可無授命之臣乎未能自投虎口比迹邠任之徒明矣假令天長喪亂九流渾濁當與臧洪遊於地下不復多言公視書歎息以示諸佐曰事人當如此三月軍次江陵初雍州刺史魯宗之常慮不爲公所容與休之相結至是幸其子竟陵太守軌會于江陵江夏太守劉虔之邀之軍敗見殺公命彭城內史徐達之參軍王允之出江夏口復爲軌所敗竝沒時公軍泊馬頭卽日率衆軍濟江躬督諸將登岸莫不奮踊爭先休之衆潰與軌等奔襄陽江陵平加領南蠻校尉將拜值四廢日佐史鄭鮮之褚叔度

王弘傳亮白遷日不許下書曰此州積弊事故相仍民疲田蕪杼軸空匱加以舊章乖昧事役頻苦童耄奪養老穉服戎空戶從役或越紼應召每未懷民瘼宵分忘寢誠宐蠲除苛政弘茲簡惠庶令凋風弊政與事而新寧一之化成於朞月荆雖二州西局蠻府吏及軍人年十二以還六十以上及扶養孤幼單下大艱悉仰遣之窮獨不能存者給其長賑府州久懃將吏依勞銓序并除今年租稅四月公復率衆進討至襄陽休之奔羌天子復重申前命授太傅揚州牧劔履上殿入朝不趨贊拜不名加前部羽葆鼓吹置左右長史司馬從事中郎

四人封公第三子義隆爲北彭城縣公以中軍將軍道
憐爲荊州刺史八月甲子公至自江陵奉還黃鉞固辭
太傅州牧前部羽葆鼓吹其餘受命朝議以公道尊勳
重不宐復施敬護軍旣加殊禮奏事不復稱名以世子
爲兗州刺史十二年正月詔公依舊辟士加領平北將
軍兗州刺史增都督南秦凡二十二州公以平北文武
寡少不宐別置於是罷平北府以併大府以世子爲豫
州刺史三月加公中外大都督初公平齊仍有定關洛
之意值盧循侵逼故其事不諧荆雖旣平方謀外略會
羌主姚興死子泓立兄弟相殺關中擾亂公乃戒嚴北

討加領征西將軍司豫二州刺史以世子爲徐兗三州
刺史下書曰吾倡大義首自本州克復皇祚遂建勳烈
外夷勅敵內清姦軌皆邦人州黨竭誠盡力之效也情
若風霜義貫金石今當奉辭西旆有事關河弱嗣叨蒙
復忝今授情事纏綿可謂深矣頃軍國務殷刑辟未息
眷言懷之能不多歎其犯臯繫五歲以還可一原遣文
武勞滿未蒙榮轉者便隨班序報公受中外都尉及司
州竝辭大司馬琅邪土禮敬朝議從之公欲以義聲懷
遠奉琅邪王北伐五月羌僞黃門侍郎尹冲率兄弟歸
順又加公北雍州刺史前部羽葆鼓吹增班劍爲四十

人解中書監八月丁巳率大衆發京師以世子爲中軍
將軍監太尉留府事尚書右僕射劉穆之爲左僕射領
監軍中軍二府軍司入居東府摠攝內外九月公次于
彭城加領徐州刺史先是遣冠軍將軍檀道濟龍驤將
軍王鎮惡步向許洛羌緣道屯守皆望風降服爲兗州
刺史韋華先據倉垣亦率衆歸順公又遣北兗州刺史
王仲德先以水軍入河仲德破索虜於東郡涼城進平
滑臺十月衆軍至洛陽圍金墉泓弟僞平南將軍洸請
降送于京師脩復晉五陵置守衛天子詔曰夫嵩岱配
極則乾道增輝藩嶽作屏則帝王成務是以夏殷資昆

彭之伯有周倚齊晉之輔鑒諸前典儀以形萬代翼治扶
危靡不由此太尉公命世天縱齊聖庶與淵明燭四方道
光宇宙爰自缺初迪則投勲王國妖螫孔熾則功存

社稷固以四維是荷萬邦攸賴者矣暨桓玄僭逆傾蕩
四海公深秉大節靈武霆震弘濟朕躬再造王室每惟
勳德銘于厥心遂北清海岱南夷百越荆雍稽服庸氓
順軌剋黜方難式遏寇虐及阿衡王猷班序內外仰興
絕風傍嗣逸業秉禮以整俗遵王以垂訓聲教遠被無
思不洽爰暨木居海處之首被髮彫題之長莫不忘其
陋險九譯來庭此蓋播諸徽策靡究其詳者也曩者永

嘉不綱諸夏幅裂終古帝居淪胥戎虜永言園陵率土
同慕公明發遐慨撫機電征親董侯伯稜威致討旗旛
首塗則八表響震偏師先路則多壘雲徹舊都載清五
陵復禮百城屈膝十落影從自篇籍所載生民以來勳
德懋功未有若此之盛者也昔周呂佐獻聖之主因三
分之形把旄仗鉞一時指麾皆大啓壇宇跨州兼國其
在桓文方茲尤儉然亦顯被寵章光錫殊品況乃獨絕
百代顧邈前烈者哉朕每弘鑒古訓思遵令圖以公深
秉冲挹用闕大禮天人引領于茲歷載況今禹迹齊軌
九隩同文司勳抗策普天增佇遂公高挹大愆國章三

靈眷屬朕實祗懼便宜顯荅羣望允崇盛典其進位相
國摠百揆揚州牧封十郡爲宋公備九錫之禮加璽綬
遠遊冠位在諸侯王上加相國綠綬綬策曰朕以寡昧
仰纘洪基夷羿乘豐蕩覆王室越在南鄙遷于九江宗
祀絕饗人神無位提挈羣凶寄命江滸則我祖宗之業
奄墜于地七百之祚翦焉旣傾若涉淵海罔知攸濟天
未絕晉誕育英輔振厥弛維再造區物興亡繼絕俾昏
作明元勳至德朕實賴焉今將授公典策其敬聽朕命
乃者桓玄肆僭滔天泯夏拔本塞源顛倒六位庶僚俛
眉四方莫卹公精貫朝日氣凌霄漢奮其靈武大殲羣

慝剋復皇邑奉帝歆神此公之節始於勤王者也授律
羣后泝流長驚薄伐崢嶸獻捷南郢大憝折首羣逆畢
夷三光旋采舊物反正此又公之功也出藩入輔弘茲
保弼阜財利用繁殖生民編戶歲滋墾宇日啓導德明
刑四境有截此又公之功也鮮卑負衆僭盜三齊狼噬
冀青虔劉沂岱介恃遐阻仍爲邊毒公蒐乘秣駟復入
遠壇衝櫓四臨萬雉俱潰竊號之虜顯戮司寇拓土三
千申威龍漠此又公之功也盧循妖凶何隙五嶺乘虛
肆逆侵覆江豫旂拂寰內矢及王城朝野喪沮莫有固
志家獻徙卜之計國議遷都之規公乘轅南濟義形于

色嶷然內湛視嶮若夷攄略運奇英謨不世狡寇窮劔
喪旗宵遁俾我畿甸拯於將墜此又公之功也追奔逐
北揚旂江濱偏旅浮海指日過至番禺之功俘級萬數
左里之捷魚潰鳥散元凶遠近傳首萬里海南肅清荒
服來款此又公之功也劉毅叛渙負豐西夏凌上罔主
志肆奸暴附麗協黨扇蕩王畿公御軌以刑消之不日
倉兇電泝神兵風掃罪人斯得荆衡清晏此又公之功
也譙縱怙亂寇竊一隅王化阻闕三巴淪溺公指命偏
師授以良圖凌波浮湍致屆井絡僭豎伏鎖梁岷革偃
此又公之功也馬休魯宗阻兵內侮驅率二方連旗稱

亂公投袂星言斫其上略江津之師勢踰風電迴旆汚
川寔繁震懾二叛奔迸荆雍來蘇玄澤浸育溫風潛被
此又公之功也永嘉不競四夷擅華五都幅裂山陵幽
辱祖宗懷沒世之憤遺氓有匪風之思公遠齊伊宰納
隍之仁近同小白滅亡之恥鞠旅陳師赫然大號分命
羣帥北徇司兗許鄭風靡輦洛載清僞牧逾藩交臂請
罪百年榛穢一朝掃濟此又公之功也公有康宇內之
勳重之以明德爰初發迹則奇謨冠古電擊疆妖則鋒
無前對聿寧東畿大造黔首若乃草昧經綸化融於歲
計扶危靜亂道固於苞桑辯方正位納之軌度蠲削煩

苛較若畫一淳風美化盈塞宇宙是以絕域獻琛遐夷
納貢王略所宣九服率從雖文命之東漸西被咎繇之
邁于種德何以尚茲朕聞先王之宰世也庸勳尊賢建
侯胙土褒以寵章崇其徽物所以協輔皇家永隆藩屏
故曲阜光啓遂荒徐宅營丘表海四履有聞其在襄王
亦賴匡霸又命晉文備物光錫惟公道冠前烈勳高振
古而殊典未加朕甚懵焉今進授相國以徐州之彭城
沛蘭陵下邳淮陽山陽廣陵兗州之高平魯泰山十郡
封公爲宋公錫茲玄土苴以白茅爰定爾居用建冢社
昔晉鄭啓藩入作卿士周邵保傳出摠二南內外之重

公實兼之命使持節太尉尚書左僕射晉寧縣五等男
湛授相國印綬宋公璽紱使持節兼司空散騎常侍尚
書陽遂鄉侯泰授宋公茅土金虎符第一至第十左竹
使符第一至第十左相國位無不摠禮絕朝班居常之
名宜與事革其相國摠百揆去錄尚書之號上送所假
節侍中中外都督太傅太尉印綬豫章公印策進揚州
牧領征西將軍司豫北徐雍四州刺史如故公紀綱禮
度萬國是式秉介蹈方罔有遷志是以錫公大輅戎輅
各一玄牡二駟公抑末敦本務農重積采蘋是殷稼穡
惟阜是用錫公袞冕之服赤舄副焉公閑邪納正移風

改俗陶鈞品物如樂之和是用錫公軒縣之樂六佾之
舞公宣美王化導揚休風華夷企踵遠人胥萃是用錫
公朱戶以居公官方任能網羅幽滯九臯辭野髦士盈
朝是用錫公納陛以登公當軸處中率下以義式遏寇
讎清除苛慝是用錫公虎賁之士三百人公明罰恤刑
庶獄詳允放命于紀罔有攸縱是用錫公鈇鉞各一公
龍驤鳳矯咫尺八紘括囊四海折衝無外是用錫公彤
弓一彤矢百盧弓十盧矢千公溫恭孝思致虔禋祀忠
肅之志儀刑萬方是用錫公秬鬯一卣圭瓚副焉宋國
置丞相以下一遵舊儀欽哉其祗服往命茂對天休簡

恤庶邦敬敷顯德以終我高祖之嘉命置朱國侍中黃
門侍郎尚書左丞郎隨大使奉迎袍罕虜乞佛熾槃遣
使詣公求効力討羌拜西平將軍河南公十三年正月
公以舟師進討留彭城公義隆鎮彭城軍次留城經張
良廟令曰夫盛德不泯義在祀典微管之歎撫事彌深
張子房道亞黃中照隣殆庶風雲言感蔚爲帝師大拯
橫流夷項定漢固以參軌伊望冠德如仁若乃神交圯
上道契商洛顯晦之間窈然難究源流淵浩莫測其端
矣塗次舊沛佇駕留城靈廟荒殘遺象陳昧撫迹懷人
慨然未歎過大梁者或佇想於夷門遊九原者亦流連

於隨會可改構榱桷脩飾丹青蘋蘩行潦以時致薦以
紓懷古之情用存不刊之烈天子追贈公祖爲太常父
爲左光祿大夫讓不受二月冠軍將軍檀道濟等次潼
關三月庚辰大軍入河索虜步騎十萬營據河津公命
諸軍濟河擊破之公至洛陽七月至陝城龍驤將軍王
鎮惡伐木爲舟自河浮渭八月扶風太守沈田子大破
姚泓於藍田王鎮惡剋長安生擒泓九月公至長安長
安豐稔帑藏盈積公先收其彝器渾儀士圭之屬獻于
京師其餘珍寶珠玉以班賜將帥執送姚泓斬于建康
市謁漢高帝陵大會文武於未央殿十月天子詔曰朕

聞先王之莅天下也上則大寶以尊德下則建侯以褒
功是以成勳告就文命有玄圭之錫四海來王姬旦饗
龜蒙之封夫翼聖宣績輔德弘猷禮窮元賞寵章希世
況明保冲昧獨運陶鈞者哉朕以不德遭家多難雲雷
作屯夷羿竊命失位京邑遂播蠻荆艱難卑約制命凶
醜相國宋公天縱睿聖命世應期誠貫三靈大節宏發
拯朕窮於巢幕迴靈命於已崩固已道窮北面暉格八
表者矣及外積全國之勳內累戡黎之伐芟夷彊妖之
始蘊崇姦猾之源顯仁藏用之道六府孔脩之績莫不
雲行雨施能事必舉諒已方軌於三五不容於典策者

焉自永嘉喪師綿踰十紀五都分崩然正朔時暨唯三
秦懸隔未之暫賓至今羌虜襲亂淫名三世資百二之
易守恃函谷之可關廟筭韜略不謀之日久矣公命世
撫運闡曜威靈內研諸侯之慮外致上天之罰故能倉
兕甫訓則許鄭風偃鉦鉞未指則瀝洛霧披俾舊闕之
陽復集萬國之軫東京父老重覩司隸之章俾朕負屨
高拱而保大洪烈是用遠鑒前典延卽羣謀敬授殊錫
光啓壇宇乘馬之制有陋舊章徽稱之美未窮上爵豈
足以顯報懋功允塞民望藩輔王畿長轡六合者乎寔
以公每秉謙德卑不可踰難進之道以寵爲戚是故降

損盛制且有後命也自茲迄今洪勳彌劭稜威九河魏
趙底服迴轅嶠潼連城冰泮遂長驅灞澹懸於龍門途
虜姚泓係頸就擒百稔梗穢滌於崇朝祖宗遺憤雪於
一旦涉禹之迹方行天下至于海外罔有不服功固萬
世其寧惟末豈金石雅頌所能讚揚寔可以告於神明
勒銘嵩岱者已朕又聞之周道方遠則鸞鷲鳴岐二南
播德則麟騶呈瑞自公大號初發爰暨告成靈祥炳煥
不可勝紀豈伊素雉遠至嘉禾近歸而已哉朕每仰鑒
玄應俯察人謀進惟道勳退惟國典豈得遂公沖挹而
文蘊盛策便宜敬行大禮允副幽顯之望其進宋公爵

爲王以徐州之海陵東安北琅邪北東莞北東海北譙
北梁豫州之汝南北潁川北南頓凡十郡益宋國其相
國揚州牧領征西將軍司豫北徐雍四州刺史如故十
一月前將軍劉穆之卒以司馬徐羨之代掌留任大事
皆所決於穆之者皆悉以諮公欲息駕長安經略趙魏
會穆之卒乃歸十二月庚子發自長安以桂陽公義真
爲安西將軍雍州刺史留腹心將佐以輔之閏月公自
洛入河開汴渠以歸十四年正月壬戌公至彭城解嚴
息甲以輔國將軍劉遵考爲并州刺史領河東太守鎮
蒲坂公解司州領徐冀二州刺史固讓進爵六月受相

國宋公九錫之命曰孤以寡薄負荷殊重守位奉藩
危溢是懼朝恩隆泰委美推功遂方軌齊晉擬議國典
雖亮誠守分十稔于今而成命弗迴百辟胥暨內外庶
僚敦免周至籍運來之功參休明之迹乘菲薄之資同
盛德之事監寐末言未知攸託隆祚之始思覃斯慶其
赦國內殊死以下今月二十三日昧爽以前悉皆原宥
鰥寡孤獨不能自存者人賜粟五斛府州刑罪亦同蕩
然其餘詳依舊準詔崇豫章公大夫人爲宋公大妃世
子爲中軍將軍副貳相國府以太尉軍諮祭酒孔季恭
爲宋國尚書令青州刺史檀祗爲領軍將軍相國左長

史王弘爲尚書僕射其餘百官悉依天朝之制又詔宋
國所封十郡之外悉得除用先是安西中兵參軍沈田
子殺安西司馬王鎮惡諸將軍復殺安西長史王脩關
中亂十月公遣右將軍朱齡石代安西將軍桂陽公義
真爲雍州刺史義真旣還爲佛佛虜所追大敗僅以身
免諸將帥及齡石並沒領軍檀祗卒以中軍司馬檀道
濟爲中領軍十二月天子崩太司馬琅琊王卽帝位
元熙元年正月詔遣大使徵公入輔又申前命進公爵
爲王以徐州之海陵東海北譙北梁豫州之新蔡兗州
之北陳留司州之陳郡汝南潁州滎陽十郡增宋國七

月乃受命赦國內五歲刑以下遷都壽陽以尚書劉懷
慎爲北徐州刺史鎮彭城九月解揚州十二月天子命
王冕十有二旒建天子旌旗出警入蹕乘金根車駕六
馬備五時副車置旄頭雲罕樂舞八佾設鐘篥宮縣進
王太妃爲太后王妃爲王后世子爲太子王子王孫爵
命之號一如舊儀

二年四月徵王入輔六月至京師晉帝禪位于王詔曰
夫天造草昧樹之司牧所以陶鈞三極統天施化故大
道之行選賢與能隆替無常期禪代非一族貫之百王
由來尚矣晉道陵遲仍世多故爰暨元興禍難旣積至

三光貿位冠履易所安皇播越宗祀墮泯則我宣元之
祚未墜于地顧瞻區域翦焉已傾相國宋王天縱聖德
靈武秀世一匡頽運再造區夏固以興滅繼絕舟航淪
溺矣若夫仰在璿璣旁穆七政薄伐不庭開復壇宇遂
乃三俘僞主開滌五都雕顏卉服之鄉龍荒朔漠之長
莫不迴首朝陽沐浴玄澤故四靈効瑞川岳啓圖嘉祥
雜遝休應炳著玄象表革命之期華裔注樂推之願代
德之符著乎幽顯瞻烏爰止允集明哲夫豈延康有歸
咸熙告謝而已哉昔火德旣微魏祖底績黃運不競三
后肆勤故天之曆數寔有攸在朕雖庸闇昧於大道未

鑒廢興爲日已久念四代之高義稽天人之至望予其
遜位別宮歸禪于宋一依唐虞漢魏故事詔草旣成送
呈天子使書之天子卽便操筆謂左右曰桓玄之時天
命已改重爲劉公所延將二十載今日之事本所甘心
甲子策曰咨爾宋王夫玄古權輿悠哉邈矣其詳靡得
而聞爰自書契降逮三五莫不以上聖君四海止戈定
大業然則帝王者宰物之通器君道者天下之至公昔
在上葉深鑒茲道是以天祿旣終唐虞弗得傳其嗣符
命來格舜陶不獲全其謙所以經緯三才澄序彝化作
範振古垂風萬葉莫尚於茲自是厥後歷代彌劭漢旣

嗣德於放勛魏亦方軌於重華諒以協謀乎人鬼而以
百姓爲心者也昔我祖宗欽明辰居其極而明晦代序
盈虧有期翦商兆禍非唯一世曾是弗剋矧伊在今天
之所廢有自來矣唯王體上聖之姿苞二儀之德明齊
日月道合四時乃者社稷傾覆王拯而存之中原蕪梗
又濟而復之自負固不賓于紀放命肆逾滔天竊據萬
里靡不潤之以風雨震之以雷霆九伐之道旣敷八法
之化自理豈伊博施於民濟斯黔庶固以義洽四海道
威八荒者矣至於上天垂象四靈效徵圖讖之文旣明
人神之望已改百工歌於朝庶民頌于野億兆抃踊傾

佇惟新自非百姓樂推天命攸集豈伊在予所得獨專
是用仰祇皇靈俯順羣議敬禪神器授帝位于爾躬大
祚告窮天祿未終於戲王其允執其中敬遵典訓副幸
土之嘉願恢洪業於無窮時膺休祐以答三靈之眷望
又璽書曰蓋聞天生蒸民樹之以君帝皇寄世實公四
海崇替係於勳德升降存乎其人故有國必亡十年著
其數代謝無常聖哲握其符昔在上世三聖係執疇咨
四嶽以弘揖讓惟先王之有作永垂範於無窮及劉氏
致禪寔堯是法有魏告終亦憲茲典我世祖所以撫歸
運而順人事乘利見而定天保者也而道不常泰戎夷

亂華喪我洛京蹙國江表仍邁否運淪沒相因逮于元
興遂傾宗祀幸賴神武光天大節宏發匡復我社稷重
造我國家惟王聖德欽明則天光大應期誕載明保王
室內紓國難外播宏略誅大憝於漢陽逋僭盜於沂渚
澄氛西岷肅清南越再靜江湘拓定樊沔若乃求懷區
宇思一聲教王師首路則伊洛澄流稜威嶠瀆則華嶽
褰靄偏酋銜壁咸陽卽序雖彝器所銘詩書所詠庸勳
之盛莫之與二也遂偃武脩文誕敷德政八統以馭萬
民九職以刑邦國思兼三王以施四事故能信著幽顯
義感殊方自歷世所賓舟車所暨靡不謳歌仁德抃舞

來庭朕每敬惟道勳未察符運天之曆數實在爾躬是以五緯升度屢示除舊之迹三光協數必昭布新之祥圖讖禎瑞皎然斯在加以龍顏英特天授殊姿君人之表煥如日月傳稱惟天爲大惟堯則之詩云有命自天命此文王夫或躍在淵者終饗九五之位勳格天地者必膺大寶之業昔土德告泯傳胙于我有晉今曆運改卜永終于茲亦以金德而傳于宋仰四代之休義鑒明昏之定期詢于羣公爰逮庶尹咸曰休哉罔違朕志今遣使持節兼太保散騎常侍光祿大夫澹兼太尉尚書宣範奉皇帝璽綬受終之禮一如唐虞漢魏故事王其

允荅人神君臨萬國時膺靈祉酬于上天之眷命王奉表陳讓晉帝已遜琅邪王第表不獲通於是陳留王度嗣等二百七十人及宋臺羣臣並上表勸進上猶不許太史令駱達陳天文符瑞數十條羣臣又固請王乃從之

宋書卷二終

宋書卷三

本紀第三

梁沈約撰

皇明朝列大夫國子監祭酒臣方從哲

承德郎右春坊右中允管國子監書事臣黃汝良等奉

勅重校刊

武帝下

永初元年夏六月丁卯設壇於南郊卽皇帝位柴燎告
天策曰皇帝臣裕敢用玄牡昭告皇天后帝晉帝以上
世告終曆數有歸欽若景運以命于諱大樹君宰世天
下爲公德充帝王樂推攸集越俶唐虞降暨漢魏靡不

以上哲格文祖元勳陟帝位故能大拯黔首垂訓無窮
晉自東遷四維不振宰輔憑依爲日已久難棘隆安禍
成元興遂至帝主遷播宗祀堙滅裕雖地非齊晉衆無
一旅仰憤時難俯悼橫流投袂一援則皇祀克復及危
而能持顛而能扶姦宄具殲僭僞必滅誠興廢有期否
終有數至於大造晉室撥亂濟民因藉時來實尸其重
加以殊俗慕義重譯來庭正朔所暨咸服聲教至乃三
靈垂象山川告祥人神協祉歲月滋著是以羣公卿士
億兆夷人僉曰皇靈降鑒於上晉朝款誠於下天命不
可以久淹宸極不可以暫曠遂逼羣議恭茲大禮猥以

寡德託於兆民之上雖仰畏天威略是小節顧探未懷
祗懼若實敬簡元辰升壇受禪告類上帝用酬萬國之
情克隆天保未祚于有宋惟明靈是饗禮畢備法駕幸
建康宮臨太極前殿詔曰夫世代迭興承天統極雖遭
遇異塗因革殊事若乃功濟區宇道振生民興廢所階
異世一揆朕以寡薄屬當艱運籍否終之期因士民之
力用獲拯溺匡世撥亂安國寧民業未半古功參曩烈
晉氏以多難仍邁曆運已移欽若前王憲章令軌用集
大命于朕躬惟德匪嗣辭不獲申遂祗順三靈饗茲景
祚燔柴于南郊受終于文祖猥當與能之期爰集樂推

之運嘉祚肇開隆慶惟始思俾休嘉惠茲兆庶其大赦
天下改晉元熙二年爲永初元年賜民爵二級鰥寡孤
獨不能自存者人穀五斛逋租宿債勿復收其有犯鄉
論清議賊汙淫盜一皆蕩滌洗除與之更始長徒之身
特皆原遣亡官失爵禁錮奪勞一依舊準封晉帝爲零
陵王令食一郡載天子旂旗乘五時副車行晉正朔郊
祀天地禮樂制度皆用晉典上書不爲表荅表勿稱詔
追尊皇考爲孝穆皇帝皇妣爲穆皇后尊王太后爲皇
太后詔曰夫微禹之感歎深後昆盛德必祀道隆百世
晉氏封爵咸隨運改至於德參微管勳濟蒼生愛人懷

樹猶或勿翦雖在異代義無民絕降殺之儀一依前典
可降始興公封始興縣公廬陵公封柴桑縣公各千戶
始安公封荔浦縣侯長沙公封醴陵縣侯康樂公可卽
封縣侯各五百戶以奉晉故丞相王導太傅謝安大將
軍溫嶠太司馬陶侃車騎將軍謝玄之祀其宣力義熙
豫同艱難者一依本秩無所減降封晉臨川王司馬寶
爲西豐縣侯食邑千戶庚午以司空道憐爲太尉封長
沙王追封司徒道規爲臨川王尚書僕射徐羨之加鎮
軍將軍右衛將軍謝晦爲中領軍宋國領軍檀道濟爲
護軍將軍中領軍劉義欣爲青州刺史立南郡公義慶

爲臨川王又詔曰夫銘功紀勞有國之要典慎終追舊
在心之所隆自大業創基十有七載世路迍邐戎車歲
動自東徂西靡有寧日實賴將帥竭心文武盡効寧內
拓外迄用有成威靈遠著寇逆消蕩遂當揖讓之禮猥
饗天人之祚念功簡勞無忘鑒寐凡厥誠勤宜同國慶
其酬賞復除之科以時論舉戰亡之身厚加復贈乙亥
立桂陽公義真爲廬陵王彭城公義隆爲宜都王第四
皇子義康爲彭城王丁丑詔曰古之王者巡狩省方躬
覽民物搜揚幽隱拯災卹患用能風澤遐被遠至邇安
朕以寡闇道謝前哲因受終之期託兆庶之上鑒寐屬

慮思求民瘼才弱事艱若無津濟夕惕永念心馳遐域
可遣大使分行四方旌賢舉善問所疾苦其有獄訟虧
濫政刑乖愆傷化擾治未允民聽者皆當具以事聞方
事之宜無失厥中暢朝廷乃眷之旨宣下民壅隔之情
戊寅詔曰百官事殷俸薄祿不代耕雖國儲未豐要令
公私周濟諸供納昔減半者可悉復舊六軍見祿粗可
不在此例其餘官寮或自本俸素少者亦疇量增之已
卯改晉泰始曆爲永初曆秋七月丁亥原放劫賊餘口
沒在臺府者諸徙家竝聽還本土又運舟材及運船不
復下諸郡輸出悉委都水別量臺府所須皆別遣主帥

與民和而卽時裨直不復責租民求辨又停廢虜車牛
不得以官威假借又以市稅繁苦優量減降從征關洛
殞身戰場幽沒不反者贍賜其家己丑陳留王曹虔嗣
薨辛卯復置五校三將官增殿中將軍員二十人餘在
員外戊戌後將軍雍州刺史趙倫之進號安北將軍征
虜將軍北徐州刺史劉懷慎進號平北將軍征西大將
軍開府儀同三司楊盛進號車騎大將軍甲辰鎮西將
軍李歆進號征西將軍平西將軍乞佛熾盤進號安西
大將軍征東將軍高句驪王高璉進號征東大將軍鎮
東將軍百濟王扶餘映進號鎮東大將軍置東宮冗從

僕射旅賁中郎將官戊申遷神主於太廟車駕親奉壬
子詔曰往者軍國務殷事有權制劫科峻重施之一時
今王道維新政和法簡可一除之還遵舊條反叛淫盜
三犯補治士本謂一事三犯終無悛革主者頃多并數
衆事合而爲三甚違立制之旨普更申明八月戊午西
中郎將荊州刺史宜都王諱進號鎮西將軍辛酉開亡
叛赦限內首出蠲租布二年先有資狀黃籍猶存者聽
復本注諸舊郡縣以北爲名者悉除寓立於南者聽以
南爲號又制有無故自殘傷者補治士實由政刑煩苛
民不堪命可除此條罷青州并兗州戊辰詔曰彭沛下

邳三郡首事所基情義繾綣事由情獎古今所同彭城
桑梓本鄉加隆攸在優復之制宜同豐沛其沛郡下邳
可復租布三十年辛未追諡妃臧氏爲敬皇后癸酉立
王太子爲皇太子乙亥詔曰朕承曆受終猥饗天命荷
積善之祚藉士民之力率由令範先后祗嚴宣訓七廟
肇建情敬無違加以儲宮備禮皇基彌固國慶家禮爰
集旬日豈予一人獨荷茲慶其見刑罪無輕重可悉原
赦限百日以今爲始先因軍事所發奴僮各還本主若
死亡及勳勞破免亦依限還直閏月壬午朔詔曰晉世
帝后及藩王諸陵守也備宜便置格其名賢先哲見優前

代或立德著節或寧丁亂庇民墳塋未遠竝宜洒掃主者
具條以聞丁酉特進左光祿大夫孔季恭加開府儀同
三司辛丑詔曰主者處案雖多所諮詳若衆官命議宜
令明審自頃或總稱參詳於文漫略自今有曆意者皆
當指名其所見不同依舊繼啓又詔曰諸處冬使或
遣或不事役宜省可悉停唯元正大慶不在其例郡縣
遣冬使詣州及都督府亦停之九月壬子朔置東宮殿
中將軍十人員外二十人壬申置都官尚書冬十月辛
卯改晉所用王肅祥禪二十六日儀依鄭玄二十七日
而後除十二月辛巳朔車駕臨延賢堂聽訟

二年春正月辛酉車駕祠南郊大赦天下丙寅斷金銀
塗以揚州刺史廬陵王義真爲司徒以尚書僕射鎮軍
將軍徐羨之爲尚書令揚州刺史丙子南康揭陽蠻反
郡縣討破之己卯禁喪事用銅釘罷會稽郡府二月己
丑車駕幸延賢堂策試諸州郡秀才孝廉揚州秀才顧
練豫州秀才殷朗所對稱旨竝以爲著作佐郎戊申制
中二千石加公田一頃三月乙丑初限荊州府置將不
得過二千人吏不得過一萬人州置將不得過五百人
吏不得過五千人兵士不在此限夏四月己卯朔詔曰
淫祠惑民費財前典所絕可竝下在所除諸房廟其先

賢及以勳德立祠者不在此例戊申車駕於華林園聽
訟己亥以左衛將軍王仲德爲冀州刺史五月己酉置
東宮屯騎步兵翊軍三校尉官甲戌車駕又幸華林園
聽訟六月壬寅詔曰杖罰雖有舊科然職務殷碎推坐
相尋若皆有其實則體所不堪文行而已又非設罰之
意可籌量猶爲中否之格車駕又於華林園聽訟甲辰
制諸署敕吏四品以下又府署所得輒罰者聽統府寺
行四十杖秋七月己巳地震八月壬辰車駕又於華林
園聽訟九月己丑零陵王薨車駕三朝率百僚舉哀于
朝堂一依魏明帝服山陽公故事太尉持節監護葬以

晉禮冬十月丁酉詔曰兵制峻重務在得宜役身死叛
輒考傍親流遷彌廣未見其極遂令冠帶之倫淪陷非
所宜革以弘泰去其密科自今犯罪克兵合舉戶從役
者便付營押領其有戶統及謫止一身者不得復侵濫
服親以相連染已亥以涼州胡太師沮渠蒙遜爲鎮軍
大將軍開府儀同三司涼州刺史癸卯車駕於延賢堂
聽訟以員外散騎常侍應襲爲寧州刺史

三年春正月甲辰朔詔刑罰無輕重悉皆原降壬子以
前冀州刺史王仲德爲徐州刺史癸丑以尚書令楊州
刺史徐羨之爲司空錄尚書事刺又如故撫軍將軍江

州刺史王弘進號衛將軍開府儀同三司太子詹事傅
亮爲尚書僕射中領軍謝莊爲領軍將軍乙卯以輔國
將軍毛德爲司州刺史乙丑詔曰古之建國教學爲先
弘風訓世莫尚於此發蒙啓滯咸必由之故爰自盛王
迄于近代莫不敦崇學藝脩建庠序自昔多故戎馬在
郊旂旗卷舒日不暇給遂令學校荒廢講誦蔑聞軍旅
日陳俎豆藏器訓誘之風將墜于地後生大懼於墻面
故老竊歎於子衿此國風所以永思小雅所以懷古今
王略遠屆華域載清仰風之士日月以冀便宜傳延胄
子陶獎童蒙選備儒官弘振國學主者考詳舊典以時

施行二月丁丑詔曰豫州南臨江潁北接河洛民荒境曠轉輸艱遠撫莅之宜各有其便淮西諸郡可立爲豫州自淮以東爲南豫州以豫州刺史彭城王義康爲南豫州刺史征虜將軍劉粹爲豫州刺史又分荊州十郡還立湘州左衛將軍張紀爲湘州刺史戊寅以徐州之梁還屬豫州三月上不豫太尉長沙王道憐司空徐羨之尚書僕射傅亮領軍將軍謝晦護軍將軍檀道濟竝入侍醫藥羣臣請祈禱神祇上不許唯使侍中謝方明以疾告廟而已丁未以司徒廬陵王義真爲車騎將軍開府儀同三司南豫州刺史上疾瘳己未大赦天下時

秦雖流戶悉南入梁州庚申送綜絹萬匹荆雖州運米委州刺史隨宜賦給辛酉亡命刁彌攻京城得入太尉留府司馬陸仲元討斬之夏四月乙亥封仇池公楊威爲武都王平南將軍楊撫進號安南將軍丁亥以車騎司馬徐琰爲兗州刺史庚寅左光祿大夫開府儀同三司孔季恭薨五月上疾甚召太子誠之曰檀道濟雖有幹略而無遠志非如兄韶有難御之氣也徐羨之傅亮當無異圖謝晦數從征伐頗識機變若有同異必此人也小卻可以會稽江州處之又爲手詔曰朝廷不須復有別府宰相帶揚州可置甲士千人若大臣中任要宜

有爪牙以備不祥人者可以臺見隊給之有征討悉配以臺見軍隊行還復舊後世若有幼主朝事一委宰相母后不煩臨朝仗既不許入臺殿門要重人可詳給班劔癸亥上崩于西殿時六十七秋七月己酉葬丹陽建康縣蔣山初寧陵上清簡寡欲嚴整有法度未嘗視珠玉輿馬之飾後庭無紈綺絲竹之音寧州嘗獻虎魄枕光色甚麗時將北征以虎魄治金創上大悅命擣碎分付諸將平關中得姚興從女有盛寵以之廢事謝晦諫卽時遣出財帛皆在外府內無私藏宋臺旣建有司奏東西堂施局脚牀銀塗釘上不許使用直脚牀釘用鐵

諸主出適遣送不過二十萬無錦繡金玉內外奉禁莫不節儉性尤簡易常著連齒木履好出神虎門逍遙左右從者不過十餘人時徐羨之住西州嘗幸羨之便步出西掖門羽儀絡驛追隨已出西明門矣諸子旦問起居入閣脫公服止著裙帽如家人之禮孝武大明中壞上所居陰室於其處起玉燭殿與羣臣觀之牀頭有土郭壁上葛燈籠麻繩拂侍中袁顛盛稱上儉素之德孝武不荅獨曰田舍公得此以爲過矣故能光有天下克成大業者焉

史臣曰漢氏載祀四百比胙隆周雖復四海橫瀆而民

繫劉氏慄慄黔首未有遷奉之心魏武直以兵威服衆
故能坐移天曆鼎運雖改而民未忘漢及魏室衰孤怨
非結下晉藉宰輔之柄因皇族之微世檀重權用基王
業至於宋祖受命義越前模晉自社廟南遷祿去王室
朝權國命遞歸台輔君雖存主威久謝桓溫雄才蓋世
勳高一時移鼎之業已成天人之望將改自斯以後晉
道彌昏道子開其禍端元顯成其末釁桓玄藉運乘時
加以先父之業因基革命人無異心高祖地非桓文衆
無一旅曾不浹旬夷凶翦暴祀晉配天不失舊物誅內
清外功格區宇至於鍾石變聲柴天改物民已去晉異
於延康之初功實靜亂又殊咸熙之末所以恭皇高遜
殆均釋負若夫樂推所歸謳歌所集魏晉采其名高祖
收其實矣盛哉

缺

宋書卷三終

宋書卷四

本紀第四

梁沈約撰

皇明朝列大夫國子監祭酒臣方從哲

承德郎右春坊右中允管國子監書事臣黃汝良等奉

勅重刊

少帝

少帝諱義符小字車兵武帝長子也母曰張夫人晉義
熙二年生於京口武帝晚無男及帝生甚悅年十歲拜
豫章公世子帝有旅力善騎射解音律宋臺建拜宋世
子元熙元年進為宋太子武帝受禪立為皇太子永初

三年五月癸亥武帝崩是日太子卽皇帝位大赦尊皇
太后曰太皇太后六月壬申以尙書僕射傅亮爲中書
監司空徐羨之領軍將軍謝朓及亮輔政戊子太尉長
沙王道憐薨秋九月丁未有司奏武皇帝配南郊武敬
皇后配北郊冬十一月戊午有星孛於營室十二月庚
戌魏軍克滑臺明年春正月己亥朔太赦改元爲景平
元年文武進位二等辛巳祀南郊虜將達奚印破金墉
進圍虎牢毛德祖擊虜敗之虜退而復合拓跋木末又
遣平安公涉歸寇青州癸卯河南郡失守乙卯有星孛
於東壁二月丁丑太皇太后崩沮渠蒙遜上谷渾阿豺

並遣使朝貢庚辰爵蒙遜爲大將軍封河西王以阿豺
爲安西將軍沙州刺史封澆河公辛未富陽人孫法光
反寇山陰會稽太守褚談遣山陰令陸劭討敗之三月
壬寅孝懿皇后祔葬於興寧陵是月高麗國遣使朝貢
甲子豫州刺史劉粹遣軍襲許昌殺虜潁州太守庾龍
乙丑虜騎寇高平初虜自河北之敗請修和親及聞高
祖崩因復侵擾河洛之地騷然矣夏四月檀道濟北征
次臨朐焚虜攻具巳未魏軍克虎牢執司州刺史毛德
祖以歸秋七月癸酉尊所生張夫人爲皇太后丁丑以
旱詔赦五歲以下罪人冬十月巳未有星孛於氐指尾

貫攝提向大角仲月在危季月掃天倉而後滅是歲魏
主拓跋嗣薨子燾立十二月丙寅省寧州之江陽犍爲
安上三郡合爲宋昌郡

二年春正月癸巳朔日有蝕之廢南豫州刺史廬陵王義
真爲庶人徙新安郡乙未以皇弟義恭爲冠軍將軍南豫
州刺史乙巳大風天有五色雲占者以爲有兵高麗國遣使
貢獻執政使使者誅義真於新安夏五月江州刺史檀道濟
楊州刺史王弘入朝帝居處所爲多過失乙酉皇太后令曰
王室不造天禍未悔先帝創業弗永棄世登遐義符長嗣屬
當天位不謂窮凶極悖一至於此大行在殯宇內哀惶幸災

肆於悖詞喜容表於在感至乃徵召樂府鳩集伶官優
倡管弦靡不備奏珍羞甘膳有加平日採擇媵御產子
就宮覲然無忤醜聲四達及懿后崩背重加天罰親與
左右執紼歌呼推排梓宮扞掌笑謔殿省備聞加復日
夜媠狎羣小慢戲興造千計費用萬端帑藏空虛人力
殫盡刑罰苛虐幽囚日增居帝王之位好皂隸之役處
萬乘之尊悅廝養之事親執鞭撲毆擊無辜以爲笑樂
穿池築觀朝成暮毀徵發工匠疲極兆民遠近歎嗟人
神怨怒社稷將墜豈可復嗣守洪業君臨萬邦今廢爲
滎陽王一依漢昌邑晉海西故事奉迎鎮西將軍宜都

王義隆入纂皇統始徐羨之傅亮將廢帝諷王弘檀道濟求赴國訃弘等來朝使中書舍人邢安泰潘盛爲內應是旦道濟謝晦領兵居前羨之等隨後因東掖門開入自雲龍門盛等先戒宿衛莫有禦者時帝於華林園爲列肆親自酤賣又開瀆聚土以象破岡埭與左右引船唱呼以爲歡樂夕游天泉池卽龍舟而寢其朝未與兵士進殺二侍者於帝側傷帝指扶出東閣就收璽綬羣臣拜辭送於東宮遂幽於吳郡是日赦死罪以下太后令奉還璽綬檀道濟入守朝堂六月癸丑徐羨之等使中書舍人邢安泰弑帝於金昌亭帝有勇力不卽受制突走出昌門追以門關踣之致殞時年十九

宋書卷四終

宋書卷五

本紀第五

梁沈約撰

皇明朝列大夫國子監祭酒臣方從哲

承志郎右春坊直學士監國子監書事臣黃汝良等奉

勅重校刊

文帝

太祖文皇帝諱義隆小字車兒武帝第三子也晉安帝
義熙三年生於京口盧循之難上年四歲高祖使諮議
參軍劉粹輔上鎮京城十一年封彭城縣公高祖伐羌
至彭城將進路板上行冠軍將軍留守晉朝加授使持

節監徐亮青冀四州諸軍事徐州刺史將軍如故關中
平定高祖還彭城又授監司州豫州之淮西兗州之陳
留諸軍事前將軍司州刺史持節如故將鎮洛陽仍改
授都督荆益寧雍梁秦六州豫州之河南廣平揚州之
義成松滋四郡諸軍事西中郎將荊州刺史持節如故
永初元年封宜都王食邑三千戶進督北秦并前七州
進號鎮西將軍給鼓吹一部又進督湘州是歲入朝時
年十四長七尺五寸博涉經史善隸書景平二年七月
中少帝廢百官備法駕奉迎入奉皇統行臺至江陵進
皇紱侍中臣琇散騎常侍臣嶷之中書監尚書令護軍

將軍建城縣公臣亮左衛將軍臣景仁給事中游擊將
軍龍鄉縣侯臣隆越騎校尉都亭侯臣綱給事黃門侍
郎臣孔瓌之散騎侍郎臣劉思考員外散騎侍郎臣潘
盛中書侍郎臣何尚之羽林監封陽縣開國侯臣蕭思
話長兼尚書左丞德陽縣侯臣孫康吏部郎中騎都尉
臣張茂度儀曹郎中臣徐長琳倉部郎中臣庾俊之都
官郎中臣袁洵等上表曰臣聞否泰相革數窮則變天
道所以不諂卜世所以靈長乃者運距陵夷王室艱晦
九服之命靡所適歸高祖之業將墜于地賴基厚德深
人神同獎社稷以寧有生獲又伏惟陛下君德自然聖

明在御孝悌著於家邦風猷宣於蕃牧是以徵祥雜沓符瑞燿輝宗廟神靈乃睠西顧萬邦黎獻望景託生臣等忝荷朝列豫充將命復集休明之運再覩太平之業行臺至止瞻望城闕不勝喜說鳧藻之情謹詣門拜表以聞上答曰皇運艱弊數鍾屯夷仰惟崇基感尋國故永慕厥躬悲慨交集賴七百祚永股肱忠賢故能休否以泰天人式序猥以不德謬降大命顧已兢悸何以克堪輒當暫歸朝廷展哀陵寢并與賢彥申寫所懷望體其心勿爲辭費府州佐史並稱臣請題榜諸門一依宮省上不許甲戌發江陵八月丙申車駕至京城丁酉謁

初寧陵還於中堂卽皇帝位

元嘉元年秋八月丁酉大赦天下改景平二年爲元嘉元年文武賜位二等逋租宿債勿復收庚子以行撫軍將軍荊州刺史謝晦爲撫軍將軍荊州刺史癸卯司空錄尚書事揚州刺史徐羨之進位司徒衛將軍江州刺史王弘進位司空中書監護軍將軍傅亮加左光祿大夫開府儀同三司撫軍將軍荊州刺史謝晦進號衛將軍鎮北將軍南兗州刺史檀道濟進號征北將軍甲辰追尊所生胡婕妤爲皇太后諡曰章后衛將軍南徐州刺史彭城王義康進號驃騎將軍冠軍將軍南豫州刺

史義恭進號撫軍將軍封江夏王立第六皇弟義宣爲
竟陵王第七皇帝義季爲衡陽王戊申以豫州刺史劉
粹爲雍州刺史驍騎將軍管義之爲豫州刺史南蠻校
尉到彥之爲中領軍己酉滅荆湘二州今年稅布之半
九月丙子立妃袁氏爲皇后

二年春正月丙寅司徒徐羨之尚書令傅亮奉表歸政
上始親覽車駕祠南郊大赦天下三月乙丑左將軍徐
州刺史王仲德進號安北將軍夏五月戊寅特進謝澹
卒秋八月甲申以關中流民出漢川置京兆扶風馮翊
等郡乙酉驃騎將軍南徐州刺史彭城王義康爲開府

儀同三司新除司空王弘爲車騎大將軍開府儀同三
司以右軍長史江伯爲廣州刺史冬十一月癸酉以前
將軍楊玄爲征西將軍北秦州刺史

三年春正月丙寅司徒錄尚書事揚州刺史徐羨之尚
書令護軍將軍左光祿大夫傅亮有罪伏誅遣中領軍
到彥之征北將軍檀道濟討荊州刺史謝晦上親率六
師西征大赦天下丁卯以車騎大將軍江州刺史王弘
爲司徒錄尚書事揚州刺史驃騎將軍南徐州刺史彭
城王義康改爲荊州刺史撫軍將軍南豫州刺史江夏
王義恭改爲南徐州刺史己巳以前護軍將軍趙倫之

爲鎮軍將軍閏月丙戌皇子劬生二月乙卯繫囚見徒
一皆原赦戊午以金紫光祿大夫王敬弘爲尚書左僕
射豫章太守鄭鮮之爲尚書右僕射建安太守潘城有
罪伏誅庚申特進范泰加光祿大夫是日車駕發京師
戊辰到彥之檀道濟大破謝晦於隱磯丙子車駕自蕪
湖反旆己卯擒晦於延頭送京師伏誅三月辛巳車駕
還宮夏五月乙未以征北將軍南兗州刺史檀道濟爲
征南大將軍江州刺史中領軍到彥之爲南豫州刺史
戊戌以後將軍長沙王義欣爲南兗州刺史乙巳驃騎
大將軍涼州牧大沮渠蒙遜改爲車騎大將軍詔曰夫

哲王宰世廣達四聰猶巡嶽省方採風觀政所以情僞
必審幽遐罔滯王澤無擁九臯有聞者也朕以寡薄猥
纂洪緒雖永念治道志存昧旦願言傳巖發想宵寐而
丘園之秀藏器未臻物情民隱尚隔視聽乃眷區域輟
寢忘食今氛祲祛蕩宇內寧晏旌賢弘化於是乎始可
遣大使巡行四方其宰守稱職之良閨華一介之善詳
悉列奏勿或有遺若刑獄不卹政治乖謬傷民害教者
具以事聞其高年鰥寡幼孤六疾不能自存者可與郡
縣優量賑給博採輿誦廣納嘉謀務盡銜命之旨俾若
朕親覽焉丙午車駕臨延賢堂聽訟六月己未以鎮軍

將軍趙倫之爲左光祿大夫領軍將軍丙寅車駕又於
延賢堂聽訟丙子又聽訟以右衛王華爲中護軍冬十
一月戊寅以梁南秦二州刺史吉翰爲益州刺史驃騎
參軍劉道產爲梁南秦二州刺史己亥以南蠻校尉劉
遵考爲雍州刺史十二月癸丑以中書侍郎蕭思話爲
青州刺史壬戌前吳郡太守徐佩之謀反及黨與皆伏
誅

四年春正月乙亥朔曲赦都邑百里內辛巳車駕親祠
南郊二月乙卯行幸丹徒謁京陵三月丙子詔曰丹徒
桑梓綢繆大業攸始踐境永懷觸感罔極昔漢章南巡

加恩元氏況情義二三有兼曩日思播遺澤酬慰士民
其蠲此縣今年租布五歲刑以下皆悉原遣登城三戰
及大將家隨宜隱卹丁亥車駕還宮戊子尚書右僕射
鄭鮮之卒壬寅禁斷夏至日五絲命縷之屬富陽令諸
葛闡之之議也夏四月庚戌以廷尉王徽之爲交州刺
史五月壬午中護軍王華卒京師疾疫甲午遣使存問
給醫藥死者若無家屬賜以棺器六月癸卯朔日有蝕
之庚申以金紫光祿大夫殷穆爲護軍將軍

五年春正月乙亥詔曰朕恭承洪業臨饗四海風化未
弘治道多昧求之人事鑒寐惟憂加頃陰陽違序旱疫

成患仰惟災戒責深在予思所以側身剋念議獄詳刑
上答天譴下恤民瘼羣后百司其各獻謹言指陳得失
勿有所諱甲申車駕臨玄武館閱武戊子京邑大火遣
使巡慰賑賜夏四月己亥以南蠻校尉蕭摹之爲湘州
刺史戊午以始興太守徐豁爲廣州刺史五月己卯以
湘州刺史張邵爲雍州刺史六月庚戌司徒王弘降爲
衛將軍開府儀同三司京邑大水己卯遣使檢行賑贍
以江夏內史程道惠爲廣州刺史秋八月壬戌特進左
光祿大夫范泰卒冬十月甲辰車駕於延賢堂聽訟閏
月癸未以右軍司馬劉德武爲豫州刺史辛卯安陸公

相周籍之爲寧州刺史十二月庚寅左光祿大夫領軍
將軍趙倫之卒是歲天竺國遣使獻方物

六年春正月辛丑車駕親祠南郊癸丑以驃騎將軍荆
州刺史彭城王義康爲司徒錄尚書事領平北將軍徐
州刺史三月丁巳立皇子劭爲皇太子戊午大赦天下
賜文武位一等辛酉以左衛將軍殷景仁爲中領軍夏
四月癸亥以尚書左僕射王敬弘爲尚書令丹陽尹臨
川王義慶爲尚書左僕射吏部尚書江夷爲尚書右僕
射五月壬辰朔日有蝕之癸巳以新除尚書令王敬弘
爲特進左光祿大夫甲午以撫軍司馬劉道濟爲益州

刺史乙卯於雍州置馮翊郡七月己酉以尚書左丞孔默之爲廣州刺史是月百濟王遣使獻方物九月戊子於秦州置隴西宋康二郡冬十月壬申中領軍殷景仁丁艱去職十一月己丑朔日有蝕之十二月丁亥河南國西河王遣使獻方物

七年春正月癸巳以吐谷渾慕容瓚爲征西將軍沙州刺史是月倭國王遣使獻方物三月戊子遣右將軍到彥之北伐水軍入河甲午以前征虜司馬沖爲司州刺史甲寅以前中領軍殷景仁爲領軍將軍夏四月癸未訶羅單國遣使獻方物六月己卯以冠軍將軍氏楊難

當爲秦州刺史秋七月戊子索虜碯礮戍棄城走丙申以平北諮議參軍甄法護爲梁南秦二州刺史戊戌索虜滑臺戍棄城走甲寅林邑國訶羅佗國師子國遣使獻方物冬十月甲寅罷南豫州并豫州以左將軍竟陵王義宣爲徐州刺史庚午立錢署鑄四銖錢戊寅金墉城爲索虜所陷十一月癸未虎牢城復爲索虜所陷壬辰遣征南大將軍檀道濟北討右將軍到彥之自滑臺奔退十二月辛酉以南兗州刺史長沙王義欣爲豫州刺史司徒司馬吉翰爲司州刺史乙亥京邑火延燒太社北墻兗州刺史竺靈秀有罪伏誅

八年春正月庚寅於交州復立珠崖郡癸巳以左軍將軍申宣爲兗州刺史丁酉征南大將軍檀道濟破索虜於東壽張二月乙卯以平北司馬韋朗爲青州刺史戊午以尚書右僕射江夷爲湘州刺史辛酉滑臺爲索虜所陷癸酉征南大將軍檀道濟引軍還丁丑青州刺史蕭思話棄城走以太子右衛率劉遵考爲南兗州刺史二月甲申車駕於延賢堂聽訟戊申詔曰自頃軍役殷興國用增廣資儲不給百度尚繁宜存簡約以應事實內外可通共詳思務令節儉夏四月甲寅以衡陽王師阮萬齡爲湘州刺史乙卯以後軍參軍徐遵之爲兗州

刺史六月乙丑大赦天下己卯割江南及揚州晉陵郡屬南徐州江北屬兗州以徐州刺史竟陵王義宣爲南兗州刺史司徒司馬吉翰爲徐州刺史閏月庚子詔曰自頃農桑惰業遊食者衆荒萊不闢督課無聞一時水旱便有罄匱不深存務本豐給靡因郡守賦政方畿縣宰親民之主宜思獎訓導以良規咸使肆力地無遺利耕蠶樹藝各盡其力若有力田殊衆歲竟條名列上揚州旱乙巳遣侍御史省獄訟申調役丙午以左軍諮議參軍劉道產爲雍州刺史秋八月甲辰臨川王義慶解尚書僕射丁未割豫州秦郡屬南兗州冬十二月罷湘

州還并荊州

九年春三月庚戌衛將軍王弘進位太保加中書監丁巳征南大將軍江州刺史檀道濟進位司空夏四月乙亥以護軍將軍殷穆爲特進右光祿大夫建昌縣公到彥之爲護軍將軍五月壬申中書監錄尚書事衛將軍揚州刺史王弘薨六月甲戌以左軍諮議參軍申宣爲青州刺史分青州置冀州戊寅司徒南徐州刺史彭城王義康改領揚州刺史己卯以司徒參軍崔譔爲冀州刺史壬午以吐谷渾慕容延爲東平將軍吐谷渾拾虔爲平北將軍吐渾輝伐爲鎮軍將軍癸未詔曰益梁交

廣境域幽遐治宜物情或多偏攤可更遣大使巡求民瘼置積射彊弩將軍官乙未以征西將軍沙州刺史吐谷渾慕容瓚爲征西大將軍西秦河二州刺史隴西王北秦州刺史氐楊難當加號征西將軍壬寅以撫軍將軍荊州刺史江夏王義恭爲征北將軍開府儀同三司南兗州刺史前將軍臨川王義慶爲平西將軍荊州刺史南兗州刺史竟陵王義宣爲中書監中軍將軍征虜將軍衡陽王義季爲南徐州刺史秋七月戊辰以尚書王仲德爲鎮北將軍徐州刺史庚午以領軍將軍殷景仁爲尚書僕射太子詹事劉湛爲領軍將軍壬申河南

國西河王遣使獻方物九月妖賊趙廣寇益州陷沒郡
縣州府討平之冬十一月壬子以少府甄法崇為益州
刺史癸丑於廣州立宋康郡十二月甲戌以右軍參軍
李秀之為交州刺史庚寅立第五皇子紹為廬陵王江
夏王義恭子朗為南豐縣王

十年春正月甲寅竟陵王義宣改封南譙王鎮北將軍
徐州刺史王仲德加領兗州刺史淮南太守段宏為青
州刺史己未大赦天下孤老六疾不能自存者人賜穀
五斛後將軍豫州刺史長沙王義欣進號鎮軍將軍夏
四月戊戌青州刺史段宏加冀州刺史封陽縣侯蕭思

話為梁南秦二州刺史五月林邑王遣使獻方物六月
乙亥以前青州刺史韋朗為廣州刺史闍婆州訶羅單
國遣使獻方物秋七月戊戌曲赦益梁秦三州於益州
立宋寧宋興二郡八月丁丑於青州立太原郡辛巳護
軍將軍到彥之卒冬十一月氏楊難當寇漢川丁未梁
州刺史甄法護棄城走難當據有梁州

十一年春正月亡命馬大玄羣黨數百人寇秦梁州郡
討平之二月癸酉以交阯太守李耽之為交州刺史夏
四月梁秦二州刺史蕭思話破氏楊難當梁州平五月
丁卯曲赦梁南秦二州劔閣北戊寅以大沮渠茂虔為

征西大將軍涼州刺史是月京邑大水六月丁未省魏郡是歲林邑國扶南國訶羅畢國遣使獻方物

十二年春正辛酉大赦天下辛未車駕親祠南郊癸酉封黃龍國主馮弘爲燕王夏四月乙酉尚書僕射殷景仁加中護軍丙辰詔曰周宗以寧寔由多士漢室之隆亦資得人朕寐寤樂賢爲日已久而俊哲難階明揚莫効用令遺才在野管庫虛朝永懷前載慙德深矣夫舉爾所知宣尼之篤訓貢士任官先代之成准便可宣敕內外各有薦舉當依方銓引以觀厥用是夜京郡地震六月丹陽淮南吳興義興大水京邑乘船已酉以徐豫

南兗三州會稽宣城二郡米數百萬斛賜五郡遭水民是月斷酒師子國遣使獻方物秋七月乙酉闍婆娑達國扶南國並遣使獻方物八月壬申於益州立南晉壽新巴西三郡乙亥原遭水郡諸逋負九月蜀郡賊張尋爲寇冬十一月以右軍行參軍苟道覆爲交州刺史十三年春正月癸丑上有疾不朝會二月己未司空江州刺史檀道濟有罪伏誅庚申大赦天下以中軍將軍南譙王義宣爲鎮南將軍江州刺史夏五月戊辰鎮北將軍徐兗二州刺史王仲德進號鎮北大將軍庚辰以征北司馬王方俛爲兗州刺史六月高麗國武都王遣

使獻方物秋七月己未零陵王太妃薨追崇爲晉皇后
葬以晉禮八月庚寅尚書僕射中護軍殷景仁改爲護
軍將軍九月癸丑立第二皇子濬爲始興王第三皇子
諱爲武陵王

十四年春正月辛卯車駕親祠南郊大赦天下文武賜
位一等孤老六疾不能自存者人賜穀五斛二月壬子
以步兵校尉劉道真爲梁南秦二州刺史夏四月丁未
以輔國將軍周籍之爲益州刺史秋八月戊午以尚書
金部郎中徐森之爲交州刺史冬十二月辛酉停賀雪
河南國西河王訶羅單國並遣使獻方物

十五年春正月丁未以平東將軍吐谷渾慕容延爲鎮
西將軍秦河二州刺史夏四月甲辰燕王年遣使獻方
物立皇太子妃殷氏賜王公以下各有差己巳以倭國
王珍爲安東將軍五月己丑特進右光祿大夫殷穆卒
辛卯鎮北大將軍徐州刺史王仲德卒壬辰以右衛將
軍劉遵考爲徐兗二州刺史秋七月辛未地震甲戌以
陳南頓二郡太守徐循爲寧州刺史八月辛丑以左衛
將軍趙伯符爲徐兗二州刺史甲寅以始興內史陸徽
爲廣州刺史丁巳以兗州刺史王方侁爲青冀二州刺
史是歲武都王河南國高麗國倭國扶南國林邑國並

遣使獻方物

十六年春正月戊寅車駕於北郊闕武庚寅司徒錄尚書事揚州刺史彭城王義康進位大將軍領司徒餘如故征北將軍開府儀同三司南兗州刺史江夏王義恭進位司空司史如故特進左光祿大夫王敬弘開府儀同三司癸巳復分荊州置湘州二月巳亥以南徐州刺史衡陽王義季爲安西將軍荊州刺史丁未以始興王濬爲湘州刺史癸亥割梁州之巴西梓潼南宕梁南漢中南秦州之南安懷寧凡六郡屬益州分長沙江夏郡立巴陵郡屬湘州夏四月丁巳以鎮南將軍江州刺史

南譙王義宣爲征北將軍南徐州刺史平西將軍臨川王義慶爲衛將軍江州刺史六月巳酉隴西吐谷渾慕容延改封河南王癸丑以吐谷渾拾寅爲平西將軍吐谷渾繁暉爲撫軍將軍秋八月庚子立第四皇子鑠爲南平王閏月乙未鎮軍將軍豫州刺史長沙王義欣薨戊戌復分豫州之淮南爲南豫州癸卯以左衛將軍劉遵考爲豫州刺史戊申以湘州刺史始興王濬爲南豫州刺史武陵王諱爲湘州刺史冬十二月乙亥皇太子冠太赦天下是歲武都王河南王林邑國高麗國並遣使獻方物

十七年夏四月戊午朔日有蝕之五月癸巳領軍將軍劉湛母憂去職秋七月壬寅以征虜諮議參軍杜驥爲青州刺史壬子皇后袁氏崩八月徐兗青冀四州大水已未遣使檢行賑卹九月壬子葬元皇后於長寧陵冬十月戊午前丹楊尹劉湛有罪及同黨伏誅大赦天下文武賜爵一級以大將軍領司徒錄尚書揚州刺史彭城王義康爲江州刺史大將軍如故以司空南兗州刺史江夏王義恭爲司徒錄尚書事戊寅衛將軍臨川王義慶以本號爲南兗州刺史尚書僕射護軍將軍殷景仁爲揚州刺史僕射如故十一月丙戌以尚書劉義融

爲領軍將軍秘書監徐湛之爲中護軍丁亥詔曰前所給揚南徐二州百姓田糧種子兗兩豫青徐諸州比年所寬租穀應督入者悉除半今半有不收處都原之凡諸逋債優量申減又州郡估稅所在市調多有煩刻山澤之利猶或禁斷役召之品遂及稚弱諸如此比傷治害民自今咸依法令務盡優允如有不便卽依事別言不得苟趣一時以乖隱卹之旨主者明加宣下稱朕意焉癸丑尚書僕射揚州刺史殷景仁卒十二月癸亥以光祿大夫王琳爲尚書僕射戊辰以南豫州刺史始興王濬爲揚州刺史湘州刺史武陵王諱爲南豫州刺史

南平王鐸爲湘州刺史是歲武都王河南王百濟國遣使獻方物

十八年春二月乙卯以豫章太守庾登之爲江州刺史夏五月壬申衛將軍南兗州刺史臨川土義慶征北將軍南徐州刺史南譙王義宣並開府儀同三司癸巳於交州置宋熙郡是月沔水泛溢六月戊辰遣使巡行賑贍辛未領軍將軍劉義融卒秋七月戊戌以徐兗二州刺史趙伯符爲領軍將軍冬十月辛亥以巴東建平二郡太守臧質爲徐兗二州刺史乙卯省南徐州之南燕濮陽南廣平郡十一月戊子尚書僕射王琳卒巳亥以

丹陽尹孟顓爲尚書僕射氏楊難當又寇漢川十二月癸亥遣龍驤將軍裴方明與梁秦二州刺史劉真道討之十二月晉寧太守夔松子反叛寧州刺史徐循討平之是歲肅特國高麗國蘇靡黎國林邑國並遣使獻方物

十九年正月乙巳詔曰夫所因者本聖哲之遠教本立化成敦學之爲貴故詔以三德崇以四術用能納諸義方致之軌度盛王祖世咸必由之永初受命憲章弘遠將陶鈞庶品混一殊風有詔典司大啓庠序而頻邁屯夷未及脩建永瞻前猷思敷鴻烈今方隅乂寧戎夏慕

嚮廣訓胄子實維時務便可式遵成規闡揚景業夏四月甲戌以久疾愈始奉初祠大赦天下五月庚寅梁秦二州刺史劉真道龍驤將軍裴方明破氐楊難當仇池平閏月京邑雨水丁巳遣使巡行賑卹六月壬午以大沮渠無諱爲征西大將軍涼州刺史秋七月以梁秦二州刺史劉真道爲雍州刺史龍驤將軍裴方明爲梁南秦二州刺史甲戌晦日有蝕之冬十月甲申芮芮國遣使獻方物己亥以晉寧太守周萬歲爲寧州刺史十二月丙申詔曰胄子始集學業方興自微言泯絕逝將千祀感事思人意有慨然奉聖之胤可速議繼襲於先廟

地特爲營造依舊給祠直令四時饗祀闕里往經寇亂黷校殘毀并下魯郡脩復學舍採召生徒昔之賢哲及一介之善猶或衛其丘壟禁其芻牧况尼父德表生民功被百代而墳塋荒蕪荆棘弗翦可蠲墓側數戶以掌洒掃魯郡上民孔景等五戶居近孔子墓側蠲其課役供給洒掃并種松柏六百株是歲婆黃國遣使獻方物二十年春正月於臺城東西開萬春千秋二門二月甲戌江州刺史庾登之爲中護軍庚申以廣陵王紹爲江州刺史仇池爲索虜所没甲寅車駕於白下閱武三月辛亥安西將軍荊州刺史衡陽王義季進號征西大將

軍以巴西梓潼二郡大守申坦爲梁南秦二州刺史夏四月甲午立第六皇子誕爲廣陵王五月癸丑中護軍庾登之卒秋七月癸丑以楊文德爲征西將軍北秦州刺史封武都王辛酉以南蠻校尉蕭思話爲雍州刺史甲子前雍州刺史劉真道梁南秦二州刺史裴方明有罪下獄死八月癸未以廷尉陶愨祖爲廣州刺史冬十二月庚午以始興內史檀和之爲交州刺史壬午詔曰國以民爲本民以食爲天故一夫輟稼饑者必及倉廩旣實禮節以興自頃在所貧罄家無宿積賦役暫偏則人懷愁墊歲或不稔而病之比室誠由政德弗孚以臻

斯弊抑亦耕桑未廣地利多遺宰守微化道之方萌庶忘勤分之義永言弘濟明發載懷雖制令亟下終莫懲勸而坐望滋殖庸可致乎有司其班宣舊條務盡敦課遊食之徒咸令附業考覈勤惰行其誅賞觀察能殿嚴加黜陟古者躬耕帝籍敬供粢盛仰瞻前王思遵令典便可量處千畝考卜元辰朕當親率百辟致禮郊甸庶幾誠素將被斯民是歲河西國高麗國百濟國倭國並遣使獻方是歲諸州郡水旱傷稼民大饑遣使開倉賑卹給賜糧種

二十一年春正月己亥南徐南豫州揚州之浙江西並

宋書卷五
本紀
禁酒大赦天下諸逋債在十九年以前一切原除去歲
失收者疇量申減尤弊之處遣使就郡縣隨宜賑卹凡
欲附農而種糧匱乏者並加給貸營千畝諸統司役人
賜布各有差戊午衛將軍臨川王義慶薨辛酉以太子
詹事劉義宗爲南充州刺史二月庚午以領軍將軍趙
伯符爲豫州刺史己丑司徒錄尚書事江夏王義恭進
位太尉領司徒庚寅以右衛將軍沈演之爲中領軍辛
卯立第七皇子宏爲建平王甲午以廣陵王誕爲南充
州刺史夏四月晉陵延陵民徐耕以米千斛助卹饑民
五月壬戌以尚書何尚之爲中護軍諮議參軍劉道錫

爲廣州刺史六月連雨水丁亥詔曰霖雨彌日水潦爲
患百姓積儉易致乏匱二縣官長及營署部司各隨統
檢實給其柴米必使周悉秋七月丁酉揚州刺史始興
王濬加中軍將軍南豫州刺史武陵王贊加撫軍將軍
乙巳詔曰比年穀稼傷損淫亢成災亦由播殖之宜尚
有未盡南徐兗豫及揚州浙江西屬郡自今悉督種麥
以助闕乏速運彭城下邳郡見種委刺史貸給徐豫土
多稻田而民間專務陸作可符二鎮履行舊陂相率修
立并課墾闢使及來年凡諸州郡皆令盡勤地利勸導
播殖蠶桑麻紵各盡其方不得但奉行公文而已八月

戊辰征西大將軍荊州刺史衡陽王義季爲征北大將軍開府儀同三司南兗州刺史征北將軍徐州刺史南譙王義宣爲車騎將軍荊州刺史南兗州刺史廣陵王誕爲南徐州刺史九月甲辰以大沮渠安周爲征西將軍涼州刺史封河西王冬十月己卯以左軍將軍徐瓊爲兗州刺史大將軍參軍申恬爲冀州刺史

二十二年春正月辛卯朔改用御史中丞何承天元嘉新曆壬辰撫軍將軍南豫州刺史武陵王諱改爲雍州刺史湘州刺史南平王鑠爲南豫州刺史二月辛巳以侍中王僧朗爲湘州刺史甲戌立第八皇子禕爲東海

王第九皇子昶爲義陽王夏六月辛亥以南豫州刺史南平王鑠爲豫州刺史秋七月己未以尚書僕射孟顓爲尚書左僕射中護軍何尚之爲尚書右僕射雍州刺史武陵王諱討緣沔蠻移一萬四千餘口於京師乙酉征北大將軍南兗州刺史衡陽王義季改爲徐州刺史九月乙未開酒禁冬十月起湖墾廢田千頃十二月乙未太子詹事范曄謀反反黨與皆伏誅丁酉免大將軍彭城王義康爲庶人庚戌以前豫州刺史趙伯符爲護軍將軍

二十三年春正月丁巳以長沙內史陸徽爲益州刺史

庚申尚書左僕射孟顓去職遷漢州流民於沔次二月
癸卯以左衛將軍劉義賓爲南兗州刺史三月索虜寇
兗豫青冀刺史申恬破之夏四月丁未大赦天下六月
癸未朔日有蝕之交州刺史檀和之伐林邑國剋之秋
七月辛未以散騎常侍杜坦爲青州刺史八月癸卯揭
陽赭賊攻建安郡燔燒城府九月己卯車駕幸國子學
策試諸生答問凡五十九人冬十月戊子詔曰庠序興
立累載胄子隸業有成近親策試觀濟濟之美緬想洙
泗永懷在昔諸生答問多可採覽教授之官並宜沾賚
賜帛各有差十二月丁酉以龍驤司馬蕭景憲爲交州

刺史是歲大有年築北堤立玄武湖築景陽山於華林
園

二十四年春正月甲戌大赦天下文武賜位一等繫囚
降宥諸逋負寬減各有差孤老六疾不能自存人賜穀
五斛蠲建康秣陵二縣今年田租之半三月壬申護軍
將軍趙伯符遷職夏四月甲戌青州刺史杜坦加冀州
刺史六月京邑疫厲丙戌使郡縣及營署部司普加履
行給以醫藥是月以貨貴制大錢一當兩秋七月乙卯
以林邑所獲金銀寶物班賚各有差八月乙未征北大
將軍徐州刺史衡陽王義季薨癸卯以南兗州刺史劉

義賓爲徐州刺史九月己未以中領軍沈演之爲領軍將軍辛未以太子詹事徐湛之爲南兗州刺史冬十月壬午豫章胡延世反殺太守桓隆之前交州刺史檀和之南還至豫章因討平之壬辰以建平王宏爲中護軍十一月甲寅立第十皇子渾爲汝陰王

二十五年春正月戊辰詔曰比者冰雪經旬薪粒貴踊貧弊之室多有窘罄可檢行京邑二縣及營署賜以柴米二月庚寅詔曰安不忘虞經世之所同治兵教戰有國之恒典故服訓明恥然後少長知禁頃戎政雖脩而號令未審今宣武場始成便可剋日大習衆軍當因校

獵隸武講事閏月己酉大蒐于宣武場三月庚辰車駕校獵夏四月乙巳新作闔闔廣莫二門改先廣莫門曰承明開陽曰津陽乙卯以撫軍將軍雍州刺史武陵王諱爲安北將軍徐州刺史癸亥以右衛將軍蕭思話爲雍州刺史五月己卯罷大錢當兩六月庚戌零陵王司馬元瑜薨庚申安北將軍徐州刺史武陵王諱加兗州刺史丙寅車騎將軍荊州刺史南譙王義宣進位司空秋七月壬午左光祿大夫王敬弘薨八月己酉以撫軍參軍劉秀之爲梁南秦二州刺史甲子立第十一皇子諱爲淮陽王九月辛未以尚書右僕射何尚之爲尚書

左僕射領軍將軍沈演之遷職吳興太守劉遵考爲領軍將軍

二十六年春正月辛巳車駕親祠南郊二月己亥車駕陸道幸丹徒謁京陵三月丁巳詔曰朕違北京二十餘載雖云密邇瞻塗莫從今因四表無塵時和歲稔復獲拜奉舊塋展罔極之思饗讌故老申追遠之懷固以義兼於桑梓情加於過沛永言慷慨感慰寔深宜聿宣仁惠覃被率上其六赦天下復丹徒縣僑舊今歲租布之半行所經縣蠲一口租之半二千石官長並勤勞王務宜有沾錫登城三

晉加贍卹遣使巡行百姓問所疾苦孤老鰥寡六疾不能自存者人賜穀五斛遣使祭晉故司空忠肅公何無忌之墓乙丑申南北沛下邳三郡復又詔曰京口肇祥自古著符近代衿帶江山表裏華甸經塗四達利盡淮海城邑高明土風淳壹苞總形勝實唯名都故能光宅靈心克昌帝業頃年岳牧遷回軍民徙散廛里廬宇不逮往日皇基舊鄉地兼蕃重宜令殷阜式崇形望可募諸州樂移者數千家給以田宅并蠲復五月丙寅詔曰吾生於此城及盧循肆亂害流茲境先帝以桑梓根本寔同休戚復以蒙稚猥同艱難情義繾綣夷險兼備舊

物遺蹤猶存心目歲月不居逝踰三紀時人故老與運
零落眷惟既往倍深感歎可搜訪于時士庶文武今尚
存者具以名聞人身已亡而子孫見在優量賜賚之車
駕水路發丹徒壬午至京師丙戌婆皇國壬辰婆達國
並遣使獻方物秋七月辛未以江州刺史廬陵王紹爲
南徐州刺史廣陵王誕爲雍州刺史八月己酉以中護
軍建平王宏爲江州刺史癸丑以南豐王朗爲湘州刺
史冬十月廣陵王誕改封隨郡王甲辰以中軍將軍揚
州刺史始興王濬爲征北將軍開府儀同三司南徐兗
二州刺史南徐州刺史廬陵王紹爲揚州刺史

二十七年春正月辛未制交寧二州假板郡縣俸祿聽
依臺除辛卯百濟國遣使獻方物二月辛丑右將軍豫
州刺史南平王鑠進號平西將軍辛巳索虜寇汝南諸
郡陳頓二郡太守鄭琨汝陽潁川二郡太守郭道隱委
守走索虜攻懸瓠城行汝南郡事陳憲拒之以軍興減
百官俸三分之一三月乙丑淮南太守諸葛闡求減俸
祿同內百官於是州及郡縣丞尉並悉同減戊寅罷國
子學乙酉以新除吏部尚書蕭思話爲護軍將軍夏四
月壬子安北將軍徐兗二州刺史武陵王贇降號鎮軍
將軍六月丁酉侍中蕭斌爲青冀二州刺史秋七月庚

午遣寧朔將軍王玄謨北伐太尉江夏王義恭出次彭城總統諸軍乙亥索虜碯碯戍委城走冬閏月癸亥玄謨攻滑臺不克爲虜所敗退還碯碯辛未雍州刺史隨王誕遣軍攻弘農城克之丙戌又克關城十一月戊子索虜陷鄒山魯陽平二郡太守崔邪利沒甲午隨王誕所遣軍又攻陝城克之癸卯左軍將軍劉康祖於壽陽尉武戌與虜戰敗見殺丁未大赦天下十二月戊午內外戒嚴乙丑冗從僕射胡崇之太子積弩將軍臧澄之建威將軍毛熙祚於盱眙與虜戰敗並見殺庚午虜僞主率大衆至瓜步壬午內外戒嚴

二十八年春正月丙戌朔以寇逼不朝會丁亥索虜自瓜步退走丁酉攻圍盱眙城是月寧朔將軍王玄謨自碯碯退還歷下二月丙辰索虜自盱眙奔走癸酉詔曰獫狁孔熾難及數州睠言念之寤寐興悼凶羯夷挫迸跡遠奔彫傷之民宜時振理凡遭寇賊郡縣令還復居業封屍掩骼賑贍饑流東作方始務盡勸課貸給之宜事從優厚其流寓江淮者並聽卽屬并蠲復稅調甲戌太尉領司徒江夏王義恭降爲驃騎將軍開府儀同三司辛巳鎮軍將軍徐兗二州刺史武陵王諱降號北中郎將壬午車駕幸瓜步是日解嚴三月乙酉車駕還宮

壬辰征北將軍始興王濬解南兖州庚子以輔國將軍
臧質爲雍州刺史戊申徐州刺史武陵王諱爲南兖州
刺史甲寅護軍將軍蕭思話爲撫軍將軍徐兗二州刺
史夏四月癸酉婆達國遣使獻方物索虜僞寧南將軍
魯爽中書郎魯秀歸順戊寅以爽爲司州刺史五月乙
酉亡命司馬順則自號齊王據梁鄒城丁巳婆皇國戊
戌河南王並遣使獻方物己巳驃騎將軍江夏王義恭
領南兖州刺史戊申以尚書左僕射何尚之爲尚書令
太子詹事徐湛之爲尚書僕射護軍將軍壬子以後將
軍隨王誕爲安南將軍廣州刺史六月壬戌以北中郎

將武陵王諱爲江州刺史以振武將軍秦郡太守劉興
祖爲青冀二州刺史秋七月甲辰安東將軍倭王倭濟
進號安東大將軍八月癸亥梁鄒平斬司馬順則冬十
月癸亥高麗國遣使獻方物十一月壬寅曲赦二兖徐
豫青冀六州是冬徙彭城流民於瓜步淮西流民於姑
熟合萬許家

二十九年春正月甲午詔曰經寇六州居業未能仍值
災澇饑困荐臻可速符諸鎮優量救卹今農事行興務
盡地利若須田種隨宜給之二月庚申虜帥拓跋燾死
庚午立第十二皇子休仁爲建安王夏四月戊午訶羅

單國遣使獻方物以驃騎參軍張永爲冀州刺史五月
甲午罷湘州并荊州以始興臨賀始安三郡屬廣州丙
申詔曰惡稔身滅戎醜常數虐虜窮凶著於自昔未勞
資斧已伏天誅子孫相殘親黨離貳關洛僞帥並懷內
款河朔遺民注誠請効拯溺蕩穢令其會也可符驃騎
司空二府各部分所統東西應接歸義建績者隨勞酬
獎是月京邑雨水六月己酉遣部司巡行賜樵米給船
撫軍將軍蕭思話率衆北伐以征北從事中郎劉瑀爲
益州刺史秋七月壬辰汝陰王渾改封武昌王淮陽王
諱改封湘東王丁酉省大司農太子僕廷尉監官八月

丁卯蕭思話攻碣礪不拔退還九月丁亥以平西將軍
吐谷渾拾寅爲安西將軍秦河二州刺史己丑撫軍將
軍徐兗二州刺史蕭思話加冀州刺史兗州如故冬十
月癸亥司州刺史魯爽攻虎牢不拔退還十一月壬寅
揚州刺史廬陵王紹薨十二月辛未以驃騎將軍南兗
州刺史江夏王義恭爲大將軍南徐州刺史錄尚書事
如故

三十年春正月戊寅以司空荊州刺史南譙王義宣爲
司徒中軍將軍揚州刺史以南兗州并南徐州庚辰以
領軍將軍劉遵考爲平西將軍豫州刺史壬午以征北

將軍南徐州刺史始興王濬爲衛將軍荊州刺史戊子
江州刺史武陵王諱統衆軍伐西陽蠻癸巳以豫州刺
史南平王鑠爲撫軍將軍車領軍將軍青徐州饑二月壬
子遣運部賑卹甲子上崩于含章殿時年四十七諡曰
景皇帝廟曰中宗三月癸巳葬長寧陵世祖踐祚追改
諡及廟號

史臣曰太祖幼年特秀顧無保傅之嚴而天授和敏之
姿自稟君人之德及正位南面歷年長乂網維備舉條
禁明密罰有恒科爵無濫品故能內清外晏四海謚如
也昔漢氏東京常稱建武永平故事自茲厥後亦每以

元嘉爲言斯固盛矣授將遣帥乖分闡之命才謝光武
而遙制兵略至於攻日戰時莫不仰聽成旨雖覆師喪
旅將非韓白而延寇蹙境抑此之由及至言漏衾衽難
結商豎蹉禍生非慮蓋亦有以而然也嗚呼哀哉

宋書卷五終

宋書卷五終

